

536

55

Mr. Gavel

46850/P

DISSERTATIO HISTORICO CRITICA
DE
F E M I N I S
EX ARTE MEDICA CLARIS

Q V A M
AMPLISSIMI PHILOSOPHORVM ORDINIS
AVCTORITATE
POLYCARPVS FRIDERICVS
SCHACHER

ARTIVM MAGISTER AC M. D. CANDIDATVS
ET
IOANNES HENRICVS SCHMIDIVS
LIPSIENSIS

PVBLICE TVEBVNTVR

LIPSIAE A. D. VIII. ID. MAI. MDCCCXXXVIII

EX OFFICINA LANGENHEMIANA.

ADAMO GONTHO CHITICA

DE

F E M I N I S

EX ARTE MEDICA CLARIS

OF THE

UNIVERSITY OF THE CITY OF LONDON

IN THE

POLYCARBONATE FRIDERICAS

SCHACHER

UNIVERSITY OF THE CITY OF LONDON

IN

JOHNES HENRICVS SCHMIDT

UNIVERSITY

UNIVERSITY OF THE CITY OF LONDON

UNIVERSITY OF THE CITY OF LONDON

UNIVERSITY OF THE CITY OF LONDON

VIR
ILLVSTRI
MAGNIFICO. EXCELLENTISSIMO
IACOBO. BORNIO. IC
POTENTISS. POLON. REGIS
ET. PRINCIPIS. SAXONIAE. ELECTORIS
PROCANCELLARIO
SVPREMAE. CVRIAE. PROVINCIALIS
ET. SCABINATVS. REGIO. ELECTORALIS
ADSESSORI
CIVITATIS. LIPSIENSIS
CONSVLI
AEDIS. AC. SCHOLAE. S. NICOLAO. SACRAE
ANTISTITI

VRBIS. PATRIAE. PATRI
TVLLII EXEMPLO
IVRE. MERITO. QVE. DICENDO
FONTI. ET. CAPITI
SENATORVM
CIVIVM. QVE. DELICIO
PRVDENTISSIMO
ARTIVM
QVAE. AD. HVMANITATEM. PERTINENT
EXISTIMATORI
SVMMO. MV SARVM. SVARVM. PATRONO
AC. FORTVNAE. IN. POSTERV. STATORI

S. P. D

POLYCARPV. FRIDERICVS. SCHACHERVS

V I R
ILLVSTRIS. ET. MAGNIFICE
PATRONE. OPTIME



Iu est, quod diuino nutu consilioque accidit, vt Borniana et Schacheria gens arctiori matrimonii vinculo coniungeretur. Diu etiam est, quod TIBI cum Parente meo, dum adhuc in vita mansit, interior amicitia et necessitudo intercessit, cuius amabilissimum nodum nil, nisi mors, tollere potuit.

Ego itaque, veteris TVAE in meos beneuolentiae memoriam hodie renouaturus, TE, qui vnus res meas ornare vales, adire audeo, demisse obtestans atque obsecrans, vt insignia, quae in Parentem quondam contulisti, beneficia in me, Filium, deriues, meque in clientum TVORVM, quorum saluti prospicis, numerum per-

*perbenigne recipias. Ne vero solus, et sine
comitibus, hanc eximiam mihi felicitatem ex-
peterem, Feminas ex arte medica nobiles et
claras, quas ex antiquitate repetii, socias adiun-
gendas esse putavi, sperans, me tot supplici-
bus auctum repulsam minime laturum. Quod si
preces meas audieris, et in iis, quorum rebus
bene cupis, vel ultimum mihi locum concesseris:
ego profecto in TE observando et colen-
do, quin etiam in votis, pro perpetua et TVA,
et totius DOMVS BORNIANAE, inco-
lunitate nuncupandis, nemini secundus ero,*

**ILLVSTRIS. ET. MAGNIFICI
NOMINIS. TVI**

PATRONE. OPTIME

cultor obsequentissimus,

POLYCARPVS. FRIDERICVS. SCHACHER



Q. B. F. F. F. Q. S.

§. I.



Quae res in erudita ciuitate duae plurimum possunt, hae mecum ambae faciunt in hac proposita re, mater artium, philosophia, et historia, vetustatis nuntia, quarum alteram nunc exorsurus consulam, alteram vero in ipsa pertractatione in auxilium vocabo. Constitui feminas quasdam enarrare, quae de arte medica bene meritae sunt, seque hac ratione ipsae ab obliuione vindicarunt hominum. Sed facile, nec inuitus, praeuideo, mirum hoc argumentum iis visum iri, qui mulieres, si non ab ipsorum hominum, a litteratorum tamen societate, amandandas esse contendunt. His autem, quibus ista placet opinio, eas nunc ponderandas proponam rationes, quae cum a PRIORI, tum a POSTERIORI ductae sunt; vt verbis vtar in philosophicam ciuitatem iam dudum adscriptis. Atque hae quidem, quas adhibebo, rationes eiusmodi erunt, vt certus sim, maxima ipsas ad demonstrandum virtute esse valituras. Istud, quo homo bestiis praestat, RATIO est, *qua*

A qui

qui hominibus ipsis antecellit, is demum, si M. T. CICERONEM,^{a)} philosophum Urbis praestantissimum, audias, *praeclarum quiddam adeptus esse videtur*. Iam vero RATIO, seu intellectus humanus, tres in se continet facultates, quas in lucem prodire iubet, memoriam, ingenium, iudicium: quarum in interiori eruditione nullus extat usus, nisi ad eximiam atque illustrem naturam conformatio quaedam doctrinae et assidua accesserit exercitatio. Haec philosophiae scita tam clara, nisi me sciens fallo, splendent luce, ut de iis nemo dubitet vnus. Quo magis aptum et inter se conueniens erit, haec, quae ieci, fundamenta ad rem propositam accommodare.

§. II.

Feminae peraeque, ut viri, quoniam utuntur ratione, homines et sunt, et iure meritoque vocantur. Et illas quidem rationis re vera participes esse, eamque ob causam ad homines pertinere, nemo vnquam sanus infitiri ausus est, nisi qui ingenio ludenti de industria velificari, magnoque promissor hiatu, aliis nouarum rerum curiosis verba dare voluit. Audimus quotidie mulierculas, pro suo quamque captu ratiocinantes, consilia, quae dantur, accipientes, eademque dantes aliis, si qua desiderant. Videmus, ut easdem rerum praepostere actarum poeniteat, ut alios homines ab orsis minus salutaribus auocent, itemque eos derideant vehementer, qui, qua in re suae utilitati seruire debebant, ea ipsa in re istam tantopere violant, nihil ut supra sit. Quid? quod in scholis medicorum edocemur, feminas nulla in re alia, nisi in iis corporis partibus, quae effingendae prolis causa a natura datae sunt, a viris diuersas esse atque seiunctas. Ex his propriis indiciis ac notis, non inuita differendi arte, hanc duco conclusionem: E. mulieres rationis haud sunt expertes.

a) Lib. I. de Inuent. C. IV.

pertes. Et ex hac conclusione nouam, quae huc in primis pertinet, iterum elicio: quum ratio in feminis insit, perspicuum est, easdem tribus etiam rationis viribus, memoria, ingenio, iudicio, esse praeditas. Q. E. D.

§. III.

Haec ubi posui principia, ad id ipsum, quod causa mea, in qua oranda versabor, exigit, me conuertendi viam paratam patefactamque perspicio. Facultates naturales ad genuinum, quem natura intendit, usum haud sunt idoneae ac satis accommodatae: quin etiam, ubi nulla prorsus accedit cultura, suapte sponte fiunt deteriores, eoque spoliantur usu, qui rectae rationi consentaneus esse censetur. Quapropter supremi rerum opificis sic fert voluntas, ut omnes mentis, sicut corporis, facultates, adiuuante cultura, emendentur et corrigantur. In hac vero re illi praesertim viri elaborare solent, qui doctrina ab indocta plebe secerni ac segregari moluntur. Hinc sunt in orbe litterato, qui res memoriae proprias separata voluunt exercentque opera, in eam incumbentes curam, ut alios iis ipsis vincant et antecellant. Quorum, exempli gratia, pertinent, qui in linguis excolendis, historiarumque scientia addiscenda tantum studii ponunt, quantum in nulla re alia. Alii animum iis rebus induunt, quas ingenium sibi vindicat; quorsum non immerito referri merentur, ars poetica, oratoria, pictoria, variae fictiones, quae fieri posse iudicantur, et alia eiusdem generis. Alii denique iudicium omni modo expolire conantur, eoque consilio scientias, in quibus iudicio separatim opus est, colunt, ut philosophiam ac mathesin; ut alia tacitus praeteream. Reperiuntur vero porro adhuc inter viros eruditos, theologi, iuris periti, medici, philosophi, philologi; quae quidem omnia ab institutione et usu pendent, ut in ea quisque excellat disciplina, cui in primis eximiam nauauit operam.

Quemadmodum igitur viri has mentis facultates exercent: ita mulieres aequae iisdem expoliendis diligentiam adhibere posse, nullam prorsus, quae me ancipitem dubiumque reddat, video rationem. Quin potius experientia, optima rerum magistra, illud nos quam certissime docet. Sunt enim feminae, quae memoriae culturam sibi praecipue habuerunt commendatam. Nec desunt mulieres, in quibus mira ingenii vis fulsit, ut poetiarum graecarum indicem GOTTFRIDVS OLEARIVS, vir clarissimus, contexuit; ^{b)} ut taceam, viua hodieque exempla inueniri, quae rerum elegantiorum peritum praetereunt neminem. Ecquis denique dubitabit, mulieres reperiri, quae singulari iudicandi virtute valeant? Neque aliter res sese habebit, si quae musarum cultrices sanctioris theologiae, aut iurium scientiae, aut medicinae, aut philosophiae, aut denique philologiae, separatam nauare operam moliantur.

§. IV.

Atque litteratas huiusmodi feminas eruditam ciuitatem re vera ornasse, nemo dubitabit, nisi qui scripta de iis in lucem edita non legerit. Equidem illorum commemorare nomina haud pigrarer, nisi alii viri doctissimi otia mihi ea in re fecissent. ^{c)} At facere tamen non possum, quin *Philologam* eximiam, idque nominis, si qua alia, promerentem, ANNAM F. DACERIAM ^{d)} hic loci honoris causa nominem, multis quippe ingenii monimentis clarissimam, quae, interiori

b) *de Poetris Graecis dissert.* Lipsiae MDCCVIII. habita.

c) Ex his illuc pertinet GEORG. CHRIST. LEHMS *Teutschlands galante Poetinnen Francof.* MDCCXV.

d) Huic a cl. AEGIDIO MENAGIO is habitus est honos, ut *Hi-*

storiæ Mulierum Philosopharum nitidissimae Amstelodamensis DIOGENIS LAERTII editionis, A. MDCCVIII. publicae luci expositae, Volumini II. p. 485. f. adiunctam ei inscriberet. Ego vero istam hic loci historiam nominare, mea interesse putavi.

riori vtriusque linguae peritia illam ornatam atque instructam fuisse, per se ipsa loquuntur. Cum hac *Philosopham* aliquam, eandemque iure ac merito hoc nomine dignam, coniungo, filiam nimirum RADVLPHI CVDWORTH, illustris in academia Cantabrigiensi sacrarum litterarum superiori saeculo Professoris VNICAM, DAMARIN, feminam inter ingeniosissimas eruditissimasque, imo philosophas aetatis nostrae mulieres, principem facile locum consecutam,^{e)} eoque nomine a IOANNE LOCKIO, Philosopho Angliae acutissimo, maximopere cultam.^{f)}

§. V.

Nec vero dubitandum, MULIERES etiam MEDICAS inuentas esse, quae haud spernendam sibi famam comparauerint. Ac mihi nunc stat sententia, singularia harum exempla recensere, atque ab interitu vindicare, quo *a posteriori*, vt philosophis loqui placet, demonstrem, feminis aditum ad eruditionem clausum atque interdictum haud esse. Hac vero ratione huic opinioni meae, quam in principio statim prae me tuli, maius accedit pondus, quippe quum eam et *a priori* §. II. demonstraui, et *a posteriori*, in iis, quae consequentur, planam facturum sim. Auctores hoc in labore sequar, quos prae ceteris idoneos iudicauero, hosque suis locis testes appellabo. Neque omittam, iudicia, quae in

A 3

promptu

e) Testem hanc in rem cito PETRUM BAYLIVM *Lettres choisies, Tom. III. L. 266. p. 1019.* Cette Dame merite les respects de tout le monde par ces excellentes qualitez. Idem L. 267. p. 1021. hoc iudicium tulit: Il n'y a personne au monde, qui aye plus de respect, que moi, pour son merite extraordinaire, et qui veuille faire une plus haute profes-

sion d'admirer ses vertus, sa pieté, son savoir, et milles autres perfections, qui lui font tenir un rang si distingué par les plus illustres de nôtre siecle.

f) Vid. IO. CLERIC. *Bibliothèque choisie T. VI. p. 398. seq. ubi IO. LOCKII* exhibetur elogium, idemque lectu in primis dignum.

promptu habebo, apponere, vbi opus erit, omnia obseruaturus, quae haecce commentatio desiderat historica, quaeque ars ratiocinandi in probabili hac veritate praescribit. Et illa quidem exempla nemo in dubium vocabit, quae pluribus idoneis nitentur testimoniis: cetera vero coniecturarum loco haberi cupio. Ita autem nos existimare aequum est, fieri posse, vt longe plures, quam e monumentis antiquis eruere licet, exstiterint feminae, quae humano generi sua rei medicae peritia profuerunt. Et quamquam is non sum, qui perfectissimam medicinae, secundum singulas partes suas, cognitionem illis vindicatum eam: idem tamen existimo, MEDICARVM nomen, in sensu latiori sumtum, illis quodammodo competere. Quod si non pleno iure, et secundum nostros mores, tamen exemplo fit veterum, qui *illos illasue* de familia sua, *qui vel quae* ea didicerant et exercere nouerant, quae a medicis aguntur aut requiruntur, a medicina denominabant. Quod quidem vt ingenuis medicis nullo modo potest esse dedecori: ita etiam MULIERIBVS MEDICIS, quae vel olim fuerunt vel hodieque sunt, minime omnium debere exprobrari arbitror. De cetero, ea tractandi ratione vtar, vt ordinem litterarum ante oculos positum habeam, commoditati et opportunitati legentium hac in re seruiturus.

§. VI.

ADELMOTA principem hic locum occupat, illius ordinis lege, cuius me tenacem fore, paullo ante dixi. Indicium huius MEDICAE FEMINAE mihi fecit vir doctissimus, IO. RHODIVS,^{g)} cuius hic verba habeto, quibus, quod addam, nihil prorsus me habere profiteor. Is nimirum: *consultandi*, inquit, *prudencia medendique arte* Patavii,

g) *Emend. et not. ad Scribon. Larg. CXXII. pag. 194.*

tauii, variori exemplo, eminuit ADELMOTA Maltra-
uersa, Bonitrauersi Maltrauersi Comitis Castrinoui filia,
uxor Iacobini VI. Carariensis, qui primus Papafauae gentis
adhuc Patauii nobilissimae cognomen adsciuit. Magna sane
laus a medico claro et docto profecta! Fateor enim me ne-
scire, quid maius requiri in perfecto medico possit, praeter
consultandi prudentiam et medendi artem. Haec cui insunt,
is haud dubie primum sibi locum postulare posset, etiamsi
non daretur elementorum series.

§. VII.

AEGLE est illa, cui alterum inter FEMINAS MEDI-
CAS locum tribuam. Filia est, teste HENRICO SCHAE-
VIO, ^{h)} Aesculapii, alterius medicinae inuentoris, aut certe
amplificatoris, et Lampetiae natu minima. CHRISTOPHO-
RVS quidem CELLARIVS Meibomium in antiquitatibus me-
dicis ⁱ⁾ citat, qui solo nomine ex *Suida* ^{k)} AEGLEN
notam

^{h)} *Mythol. p. m. 37.* Videtur autem
haec accepisse a LIL. GREG.
GYRALDO *Hist. Deor. Syn-
tagm. VII. p. 255.* Hic vero a scho-
liaſte ARISTOPHANIS ad
Plut. vers. 701. vt me coniectura
ducit, sumſit, cuius verba adiiciam,
vt fontium auctoſibus ſatisfaciam:
Ἑρμιππος ἐν τῷ πρώτῳ τῶν τριμέτρων
Ἀσκληπιοῦ καὶ Λαμπετίας τῆς Ἡλίου,
λέγει Μαχάονα, καὶ Ποδαλείριον, καὶ
Πανάκειαν, καὶ ἈΙΓΛΗΝ νεω-
τάτην.

ⁱ⁾ *Cap. III. de AESCVLAPII li-
beris, §. V. p. 20.*

^{k)} Nimis arcte circumſcribit MEI-
BOMIVS illam, quae nobis de
AEGLE ſuppetit, notitiam.
HERMIPPO, quem modo in-

dicauiſus, addamus licet ARI-
STIDEM oratione in *Aſclepiad.*
p. 82. Tom. I. edit. Paul. Steph. vbi
ſorores Machaonis et Podalirii no-
minibus ſuis celebrantur *Iaſo, Pa-
nacea, AEGLE et Hygea.* Ac
neſcio ſane, annon SVIDAS hic
leuem admittat medicinam, vt pla-
ne conſaneſcat. Nam ſi legas ἡ
Ἀσκληπιοῦ, Aesculapii filiam ha-
bes, et ſenſum tot aliorum aucto-
rum teſtimoniis congruum: quum
nemo indicauerit exemplum, quo
Aesculapium et AEGLEN eius-
dem poteſtatis nomina eſſe, proba-
ri queat. Exemplum autem illius,
quam hic loci commendaui, le-
ctionis habuimus in praecedenti
ſcholiaſtae loco: Λαμπετία ἡ Ἡλίου.

notam esse, hocque parenti illius attribui, perhibet. "ΑΙΓΛΗ καλεῖται, καὶ ὁ Ἀσκληπιὸς. At vero CELLARIUS a me, qui nomen AEGLES, Aesculapii filiae, proprium esse contendo, suam, si rem bene putes, haud seiungit opinionem. Cui etiam sententiae C. PLINIVS SECVNDVS fauet, atque IO. HENRICVS SCHVLZIVS, vir celeberrimus. Ille quidem *Socratis* picturas describens: ^{l)} *Tales sunt, inquit, cum Aesculapio filiae, Hygia, AEGLE, Panacea, et Iaso.* Hic vero, ^{m)} AEGLEN Aesculapii filiae re vera nomen esse, suis declarat verbis. Artis vero medicae notitia illam tinctam fuisse, SPANGENBERGIVS ⁿ⁾ auctor est, quippe qui, exempla multarum feminarum doctarum commemorans, AEGLEN vna cum his annumerat. Quin etiam CL. DANIEL CLERICVS ^{o)} hanc ipsam in feminarum numero, quae arti medicae fauerint, vult haberi. His equidem firmiora non habeo in promptu, quae meam hanc iuuent caussam.

§. VIII.

AFRICANA, mulier quaedam, siue ex nomine, siue ex regione, ita nuncupata, inter MULIERES MEDICAS quoque refertur, licet de illius scientia nullum aliud extet monumentum, nisi hoc vnicum, quod cura passionis iliacaе, et colicae famam sibi aliquam pepererit. Testem hanc in rem cito MARCELLVM BVRDEGALENSEM, ^{p)} qui, eam in hoc curando morbo exercitatum, et medicamentum, quo vsa fit, potiori parte sua cornu cerui vstum fuisse, scribit. Praeuiuit ipsi, quem fere semper sequitur, aut potius transcribit,

SCRI-

l) *Hist. nat. Lib. XXXV. Cap. XI. de pictoribus, p. m. 600.*

m) *Hist. med. Period. I. Sect. II. Cap. II. §. VI. p. m. 82.*

n) *Specul. Nobilit. P. I. Lib. XIII. c. 7. p. m. 42.*

o) *dans l' Histoire de la Medicine Second. Part. L. III. Chap. XIII. p. 432.*

p) *Lib. Medicam. c. XXIX. p. 377.*

SCRIBONIVS LARGVS, ^{q)} qui: *hoc medicamento*, inquit, *muliercula quaedam Romae ex Africa multos remediauit*. GALENVS ^{r)} eius quidem remedii *Pacchium Antiochum* auctorem facit; quum autem MARCELLVS et SCRIBONIVS AFRICANAM eo usam esse affirmant, illa post *Antiochum* aliunde hoc medicamen petiisse videtur, nisi mea me fallit coniectura. Certe SCRIBONIVS LARGVS *se per magnam curam compositionem accepisse*, id est, *pretio dato, quod desiderauerat*, diserte fatetur ac prae se fert: quumque is alio loco indicet, ab eodem *Antiocho Pacchio* acceptum sine numerato pretio medicamentum; hic vero clare testetur, se numerata pecunia hoc esse adeptum ab ipsa femina: cognoscitur hinc utique, eadem aetate AFRICANAM et SCRIBONIVM vixisse. Quod autem NICOLAUS ALEXANDRINVS, quem RHODIVS ^{s)} adducit, de se fere eadem scribit, ^{t)} id quidem manifestum reddit omnino, quod ex SCRIBONIO haec in suum opus transtulerit. Sed quoquo modo haec se res habet, CLERICVS ^{u)} certe modo laudatus non in scite ad feminas medicas eandem retulisse videtur.

§. VIII.

Iam ad AGAMEDAM, vel PERIMEDAM me conuerto, quam, teste CLERICO, ^{v)} filiam Augiae, Epeorum regis, uxoremque Mulii, ob rei medicamentariae peritiam HOMERVS memoriae prodidit ac litteris. Multum enim huic tribuens, tot ipsam scire medicamina, quot lata terra nutriat, scribit, ita canens: ^{vv)}

Ἡ τόσα φάρμακα ἤδη, ὅσα τρέφει εὐεῖα χθών.

Vide-

q) *de compos. medicam. c. XXIX. p. 72. et 73. CXXII.*

r) *de compos. medicam. Cap. DCCXLIX.*

s) *de compos. medicam. per gen. Lib. IX. C. IV.*

u) *Hist. med. ed. cit. p. 435.*

v) *Hist. med. p. 432.*

s) *Cap. XXIII. §. XCVII.*

w) *Lib. XI. Iliad. p. 219.*

Videtur tamen valde obscurum esse, magisne laudi, an vitio, tribuatur ipsi haec cognitio. Caussa dubitandi est, quod vocabulum *Φάρμακον* non minus noxia, quam salubria, medicamenta complectitur. EUSTATHIUS certe, doctissimus diuini vatis enarrator, cum Circe et Medea eam conferens, et tantum non Medae discipulam faciens, eodem nos permouet, vt de AGAMEDA suspicemur, quod veneficiis magis, quam iuuandis hominum languoribus, scientiam hanc adhibuerit. Atque in hunc sensum iterum de eadem loquitur alio loco, ^{x)} vbi aperte scribit, quod *Φαρμακὶς venefica* fuerit. Quod autem idem clarissimus HOMERI explanator eandem AGAMEDAM cum Polydamna, Thonis Aegyptii vxore confert; id quidem, vt mitius ac melius de peritia eius medica sentiamus, causam nobis dat idoneam. Putant aliqui, eandem esse HECAMEDAM, de qua sub exordium fere Lib. XIV. eiusdem *Iliados* refertur, quod aquis calidis saniem cruentam Machaonis vulnerati abluerit:

Ἐισόκε θερμὰ λóετρα εὐπλόκαμος Ἑκαμήδη,

θερμὴν καὶ λούση ἄπο βρότον αἵματόεντα.

At si quis, praeunte ANDREA TIRAQUELLO, ^{y)} dubitet, num haec ipsa HECAMEDE eadem ipsa sit, quae alibi AGAMEDA vocatur: libenter me ad eius opinionem accessurum profiteor; praesertim quum anus annosa, et vetula edentula, per senectutem vix castra sequi, aut τῆς εὐπλόκαμου, hoc est, pulchram et calamistratam comam habentis, appositum mereri potuisse videatur.

§. X.

Hanc excipit AGNODICE, virgo quaedam Attica, quae, quum incredibili medicinam, et in primis artem obstetri-

x) ad Odyss. I. p. 1415. edit. Roman. y) de Nobilit. c. XXXI. p. 220.
lin. 55.

stetriciam, addiscendi cupiditate flagraret, in ea etiam colenda, quamquam id quidem legibus Atticis interdictum esset, omnem nauauit operam, vesteque virili induta, mulieres grauidas felici cum successu curauisse scribitur. Rem, verbis HYGINI^{z)} vsurus, enarrabo: *Antiqui obstetrices non habuerunt, unde mulieres verecundia ductae interierant. Nam Athenienses cauerant, ne quis seruus aut femina artem medicam disceret: AGNODICE quaedam puella virgo concupiuit medicinam discere, quae cum concupisset, demtis capillis, habitu virili se HIEROPHILO cuidam tradidit in disciplinam, quae cum artem didicisset, et feminam laborantem audisset, ab inferiore parte veniebat ad eam: quae cum credere se noluisset, aestimans virum esse, illa tunica sublata, ostendebat, se feminam esse: et ita eas curabat. Quod cum vidissent medici, se ad feminas non admitti, AGNODICEM accusare coeperunt, quod dicerent eum glabrum esse et corruptorem earum, et illas simulare imbecillitatem. Quo cum Areopagitae concedissent, AGNODICEM damnare coeperunt, quibus AGNODICE tunicam alleuauit et se ostendit feminam esse. Et validius medici accusare coeperunt, quare tum feminae principes ad iudicium conuenerunt, et dixerunt: Vos coniuges non estis, sed hostes: quia, quae salutem nobis inuenit, eam damnatis. Tunc Athenienses legem emendauerunt, ut ingenuae artem medicinam discerent. Ab his aliena haud sunt, quae CLERICVS,^{a)} vir elegantis ingenii, in compendio exhibet: La peine, que la plûpart des femmes se font de découvrir aux Medecins certaines maladies secretes, les a obligées de long-tems à chercher d'autres femmes, à qui elles pussent en faire*

B 2

confi-

z) *Fabul. CCLXXIV. p. 201. Conf. Celeb. PLATNERI, Praeceptoris mei Venerandi, elegantissima*

Commentatio de ARTE OBSTETRICIA VETERVM. a) Hist. med. p. 432.

confidence, et qui pussent les soulager. On a voulu anciennement leur disputer ce droit ; et on s'est opposé en quelques lieux à cet établissement. Vne ancienne Loi des Atheniens defendoit aux Esclaves et aux Femmes de se mêler de la Medecine, jusque là, que le métier d'accoucher, qu'ils jugeoient dépendant de cet art, ne pouvoit être exercé, que par des hommes. Mais quelques unes des Dames Atheniennes ayant mieux aimé mourir, que de souffrir, que des hommes les accouchassent, on dit, qu'une d'entr'elles nommée AGNODICE, qui avoit appris la Medecine, et l'art d'accoucher d'un nommé Herophile, s'avisa de se travestir pour secourir les autres ; ce qui ayant été decouvert, obligea les Atheniens à faire une autre Loi, qui permettoit aux femmes de condition libre d'apprendre la Medecine.

§. XI.

Sequitur nunc ANGVITIA, siue, vt nonnulli legunt, ANGITIA, Aeetae regis filia, Circes et Medae soror. DONATVS ad THERENTIVM, ^{b)} ANGITIAM loco ANGVITIAE, sicuti Angiportum pro Anguipor-
tu, dici obseruat et contendit. CLAVDIVS SALMASIVS de ea hanc in sententiam loquitur : ANGITIAM quomodo Graeci nominabant ? si vna haec fuit ex tribus Aeetae filiabus, oportet eam Graecos nouisse, sed non isto nomine, quod mere latinum est. Rectius illi, qui Medeam ab Italis Angitiam vocatam esse, volunt. Eam Marci et Marrubii hoc nomine coluerunt. Glossae : Angitia, Μήδεα. Angitia proprie est ἡ ἐχίς, ἡ ἐχιδναία, quod potestatem in serpentes haberet, vt omnes habent Φαρμακῆς. ^{c)} SOLINVS, ^{d)} Aeetae tres filias recensens, ANGITIAM vicina Fucino occupa-
uisse,

^{b)} Adelph. Act. IV. Sc. II. v. 38. p. 841.

^{c)} in Exercit. in CAII IVLII SOLINI Polybist. p. 60. B. C.

^{d)} in Polybist. C. II. p. 11. ed. cit.

uisse, inquit, ibique salutarī scientia, aduersus morbos resistentem, cum dedisset hominem viuere, deam habitam. Ad quae verba hanc notam addidit SALMASIVS, vir litteratissimus: ^{e)} ANGITIAM salutaribus remediis morbos euincentem, cum homini iam desperato, et paene conclamato, vitam reddidisset, pro dea habitam fuisse. Siquidem locutio haec, cum dedisset hominem viuere, poetica est, et Virgiliana, qualis saepe numero inuenitur:

- - - - - tu das epulis accumbere vitam.

Herbarum vires ANGITIAM praesertim aduersus virus non fecus ac sorores nouisse, ex SILIO ITALICO ^{f)} facile intelligi potest, qui ita canit:

*Vipereumque herbis hebetare, et carmine dentem
Aeetae prolem ANGVITIAM mala gramina primam
Monstrauisse ferunt, tactuque domare venena.*

SPANGENBERGIUS ^{g)} illam quidem existimat indicari feminam, quae et ANGERONIA, vel ANGERONA dicta est, a depellendis angoribus et corporis et animi, sicuti putat VERRIVS FLACCUS, ^{h)} aut quod populus Romanus morbo, qui angina dicitur, praemisso voto sit liberatus; de quibus videatur AVR. THEODOSIVS MACROBIUS: ⁱ⁾ Duodecimo Calend. Ianuar. sunt diuae, inquit, ANGERONIAE, cui pontifices in sacello Volupiae sacrum faciunt: quam Verrius Flaccus ANGERONAM dici ait, quod angores ac animorum sollicitudines depellat. Masurius adiicit simulacrum huius deae ore obligato atque signato in ara

B 3

Volu-

e) in Exercit. p. 60. Exhibui autem verba, ut ea formis hic descripta reperi. Nullus tamen dubito, quin scribere voluerit: *epulis accumbere diuum*. Nam sic sensus et postulat, et VIRGILIUS canit *Aeneid. I. v. 83.*

f) de Secundo Bello Punico, Lib. VIII. v. 499. p. 143. ex officin. Plantinian. cIo Io c.

g) Specul. Nobilit. ed. cit. p. 427.

h) vid. Salmas. in Solin. ed. cit. p. 6. E. F.

i) Saturnal. Lib. I. Cap. X. p. 169.

Volupiae propterea collocatum, quod, qui suos dolores anxietatesque dissimulant, perueniant patientiae beneficio ad maximam voluptatem. Iulius Modestus ideo sacrificari huic Deae dicit, quod populus Romanus morbo, qui angina dicitur, praemisso voto sit liberatus. Ego vero cum celeberrimo SCHVLZIO,^{k)} credere malim, eorum opinionem, qui varia feminarum nomina, MEDEAM, ANGITIAM, et ANGERONAM pro vna eademque persona habent, infirmo niti fundamento, eamque ob causam reliqua etiam, quae de iis separatim relata leguntur, incerta esse omnia.

§. XII.

ANTIOCHIS artem salutarem sedulo etiam coluisse, hacque in primis Romae vsa esse dicitur. Mentionem eius fecerunt ASCLEPIADES^{l)} atque GALENVS. Vterque enim malagma describit eiusdem, quod in curandis splenicis, hydropicis, ischiadicis, arthriticisque morbis non infeliciter adhibuit. Non puto, quod operae pretium sit, me facturum, si eius compositionem addam. Quare potius ad GALENUM^{m)} istam lecturos remittam, qui varias species, ex quibus hoc malagma conflatum fuit, copiosius exposuit. CLERICVS, qui huic quoque feminae inter MEDICAS locum concessit, verbis non ita multis omnem eius historiam exponit: ⁿ⁾ *Galien rapporte aussi quelques compositions de medicaments d'une Antiochis, qui est apparemment la même, à qui Heraclide Tarentin avoit dédié quelques uns de ses livres, comme on l'a vu ci-dessus.*

§. XIII.

Progredior nunc ad ARTEMISIAM, Cariae regis, MAV-

SOLI

k) *Hist. med. ed. cit. p. 103.*

l) *Lib. IV. intern. citante Galeno, loco, qui proxime indicatur.*

m) *Lib. IX. pharmac. C. II. et Lib. X. C. II.*

n) *Hist. med. ed. cit. p. 434.*

SOLI II coniugem, quam in arte medica, et in primis Botanica, excellenter versatam esse, relatum legimus. HERODOTVS °) eam quidem filiam Lygdamidis, regis Cariae, esse in litteras retulit, cui vero STRABO non assentitur, qui ipsam Hecatomni filiam esse, memoriae prodidit. Is nimirum: Ἐκατόμνη, inquit, P) τῶν Καρῶν βασιλέως, ἦσαν υἱοὶ τρεῖς, Μαύσωλος, καὶ Ἰδριεύς, καὶ Πιζώδαρος, καὶ θυγατέρες δύο, ὧν ἡ πρεσβυτέρα ἈΡΤΕΜΙΣΙΑ συνώκησε τῷ πρεσβυτάτῳ τῶν ἀδελφῶν Μαυσώλῳ. Est certa herbae species, quae Artemisiae nomine insignitur, Germanisque *Beyfuss* dicitur, quae ab hac Regina nomen ducere creditur. PLINIVS enim nonnullas herbas a Regibus sua accepisse nomina, referens, Clymenum, Gentianam, atque Lyfimachiam, exempli gratia, profert, in quibus Clymenus, Gentius, et Lyfimachus, Reges Arcadiae, Illyriorum, Thraciaeque nominatim apparent. Nec aliter citatus historiae naturalis scriptor de herba Artemisia sentit: q) *Mulieres*, inquit, *quoque hanc gloriam affectauere, in quibus ARTEMISIA, uxor Mausoli, adoptata herba, quae antea parthenis vocabatur. Sunt, qui ab Artemide Ilythia cognominatum putant, quoniam priuatim medeatur feminarum malis.* Cui sententiae THEOPHRASTVS r) fauet, aequae ac APVLEIVS. s) Dantur vero duae reginae, quae ARTEMISIAE nomine appellantur, et plures etiam aliae eiusdem nominis feminae, quae multis clarissimis viris erandi praebuerunt occasionem. Atque, ut verum fatear, haec nominum varietas me ipsum dubium atque ancipitem reddit, ut vix constituere audeam, quaenam harum arti salutari studuerit. At probabili tamen veritati, atque scriptorum auctoritati, maxime videtur esse consentaneum, si eam ipsam,

o) ΗΡΟΔΟΤΟΥ ΙΣΤΟΡΙΩΝ βιβλ. εβδου. καὶ ογδ.

q) *Hist. nat. ed. cit. p. 28. Lib. XXIV. C. VII.*

p) *Rer. Geograph. Lib. XIV. p. 970. edit. Amstelodam, cl. MCCVIE.*

r) *Hist. Plant. Lib. IX. p. 1150.*
s) *de Herb. C. X.*

ipsam, de qua locuti sumus, intelligamus. Plura de ARTEMISIA lecturus, euoluat CL. CHRISTIANVM AVENARIVM.^{t)} Hoc quidem dubio caret, ARTEMISIAM aliquam, quaecunque illa demum fuerit, maximam sibi medicinae studio peperisse gloriam atque honorem. CLERICVS^{u)} haec habet: *La fameuse ARTEMISE, Reine de Carie, a aussi eu la reputation d'entendre la même art.*

§. XIV.

ASPASIAM MULIERIBVS quoque MEDICIS iure meritoque annumerandam esse, praeter alios, AETIVM praesertim testem hanc in rem cito. Plurima enim fragmenta de illa, quae de *cura praegnantibus et aegre parientibus adhibenda, de foetum corrumpentibus, de menstruis suppressis, de reclinacione ac recursu uteri, de cura circa uteri nomas, de hernia aquosa, et varicosa mulierum, de condylomatibus*, luculenter satis exponunt, AETIVS in *contracta ex veteribus medicina* exhibet. Non desunt aliae mulieres eruditae, quae eodem clarae nomine, *sapientesque et elegantes* a XENOPHONTE vocatae sunt. Sed praecipue laudatur Milesia quaedam, qua Socrates et Pericles in eloquentiae studio magistra sunt vsi: et altera Phocensis, quae in Persidem delata, Cyri primum, deinde Artaxerxis amorem meruit. Vtri vero potissimum artis obstetriciae ac medicae notitia sit attribuenda, quum definiri nequeat,^{v)} cum TIRAQUELLO non

t) *dissert. de ARTEMISIA et MAVSOLEO*, Lips. cl. 1000. xiv. habita.

u) *Hist. de la medicin.* p. 432.

v) De ASPASIA nostro aevo scripserunt multi. Nec PETRVS BAELIVS in *dictionary critico* omisit tam celebre nomen. Quum vero non satisfecerit omnibus, vir, nescio quis, perdoctus superiori

anno in lucem scriptum emisit gallicum, cui index praefixus est: *Histoire des deux Aspases, à Amsterdam, 1737. 12.* Nihil hic in medium attulit, ex quo alterutra posset vindicari medicis, qui nec magnopere de eo laborabunt, si SVIDA E fidem habuerint, scribenti: ΑΣΠΑΣΙΑΙ, δύο ἑταίρειαι. ASPASIAE, *duae meretrices.* Omnino videtur

non nisi hoc vnum prae me fero, ASPASIAM aliquam, siue SOCRATIS et PERICLIS magistra, siue Phocensis, siue denique alia iunior fuerit, MULIEREM MEDICAM fuisse. Nec enim video, cur vnus AETII testimonium hac in re plane spernendum esse videatur.

§. XV.

Accedo, his expositis, ordinem semel delectum obseruaturus, ad LVDOVICAM BURGERIAM, quam artem potissimum obstetriciam probe calluisse, constat. Nonnulla enim de ipsius hac in arte peritia extant monumenta, typis exscripta. In his liber gallica conscriptus lingua, qui hunc habet indicem: *Observations sur la sterilité, perte de fruit, fécondité, accouchements et maladies des femmes*. Hic liber ita est approbatus, vt Belgica quoque lingua Lugduni Batauorum A. P. C. N. CIOIOCC in publicum prodierit. w) Nec non, cum obstetricis munere apud reginam Galliae functa sit, libellum alium, indice: *Observations de Louyse Bourgeois, sage femme de la Reine*, notatum edidit, quem postea nouus et ab his diuersus secutus est, qui *Secrets pour les Maladies des Femmes* inscribitur. Tandem librum etiam germanico sermone loquentem et nomine eius indicatum habemus, qui quatuor Tomis continetur, ac non nisi de arte obstetricia exponit. BURGERIA igitur, his, quibus inclaruit, ingenii monumentis meruit, quae MEDICAS inter MULIERES locum non postremum obtineat, atque obstetricum nobilitati, quam PLINIVS^{x)} celebrat, adiungatur.

C

§. XVI.

videtur iunior vtraque illa esse, ex cuius scriptis sua hausit et ad nostram aetatem transmisit AETIVS.

w) Louise Bourgeoise *Aanmerkingen*

over de Onvrugtbarkeit, Misvallen, Vrugtbarkeit, Kinderbaren en Siektens der Vrouwen.

x) *Hist. natur. Lib. XXXIII. 6.*

§. XVI.

ELISABETHA CANTZI, Comes, illustrem sibi famam hoc edito peperit libello: *Enchiridion rararum et praestantissimarum medicinarum*. Anglico vsa est sermone, libellique indicem inferius in ora subiiciam. ^{y)} Hunc ex Anglico germanice vertit IO. CASP. GRIMMIVS. ^{z)} ISABELLA CORTESIA circa finem saeculi XVI floruit, atque scriptis, quae secretas artes, ac mirabilia, ex medicina, tam clinica, quam chirurgica, quin alchymica etiam, minantur, famam adepta est. Italiae ortum suum debuit, atque lingua genti huic vernacula scripsit. Indicem pro popularibus suis hunc fecit: *Varietà di Secreti d' ISABELLA CORTESI*; quem legi in editione Venetiis emissâ A. MDCCXIV. Germanicas editiones videas ab A. MDCCXCI et MDCCXCVI, atque hoc ultimo binis simul locis emissas, et magnifico titulo ornatas. Sed turpem definit in piscem mulier formosa superne, quando odoriferi saponēs, ambrata poma, et quae alia iactant

Ambubaiarum collegia, pharmacopolae, phalerarum loco ostentat, saeculo scilicet suo non omnino ingrata et iniucunda.

§. XVII.

CIRCEN ordo aduocat; de qua paucis dicam verbis. Nam

Cui non dictus Hylas?

Fabula est, Herculem, quum ab inferis Cerberum tricipitem canem adduxisset, ad hanc lucem rediisse in ora ponti Euxini,

y) *A choise Manual, or, rare secrets in Physick, and Chirurgery, Elisabeth late Countess of Kent, London MDCLXX. 12.*

z) *Elisabethae Gräfin von Kent Hand-*

büchlein rarer und sonderbahrer Artzneyen, aus dem Engl. durch Ioh. Casp. Grimm, Leipzig. MDCC. 12. ibid. MDCCXII. 12. ibid. MDCCXIII. 12.

ni, vbi proximus sit ad inferos traiectus; tunc Cerberum, prae lucis infuetae taedio, euomuisse virus, quod in plantas eius regionis migrauerit. Haec caussa esse fingitur, quam ob rem aconitum nullibi magis, quam ibi, pestiferum, et Colchicum venenum hodieque celebretur. Quin etiam hinc factum esse scribunt, vt illius tractus incolae venenorum studioso scrutinio sese darent; et antiquissimis temporibus scientia illorum famam, abusu vero infamiam consequerentur. *He-cate*, coniux Aeetae, Colchorum regis: atque ex hoc coniugio natae C I R C E cum sorore *Medea*. Veterum testimonia requirentes iuuabunt CHRISTOPHORVS CELLARIVS, ^{a)} et eius hodie successor, quem iam laudavi, SCHVLZIVS. ^{b)} C I R C E plantarum nocentium cognitione ad hominum fere perniciem toties abusa, tantum non apud omnes male audit: quamquam HOMERVS ^{c)} eam, *δῖον θεῶν*, diuam *dearum* vocans, inuidendo elogio maectat, et narrationem de ea institutam ita absoluit, vt nihil ignorasse videatur, quod vel maxime vnquam viribus veneficarum tributum fuit, quodque ab incantationibus proficisci possit. Notum est, quam multi has poetarum fabulas ad coniecturas historicae fidei propiores reuocare annisi sint; ad quorum scripta remittere curiosum lectorem liceat. Illud facile intelligitur, quantae res difficultatis plena sit ex his fabularum velis eruere, quicquid historicae veritatis subest. Si fuit C I R C E regis Aeetae vel filia, vel vxor, oportet, vt ea vixerit, et iam aetate fere confecta fuerit iis temporibus, quae Argonautica expeditio clara reddidit. Sed eandem, confe-

C 2

cto

a) *Notit. orb. antiqu. Tom. II. p. 252. edit. Lips. c151cccXXXII.*

b) *Hist. med. pag. 100. 101.*

c) *Odyss. K. vers. 400. et 487. qui et superius vers. 136. sequ. eam non filiam, sed sororem Aeetae regis di-*

cit, matrem vero perhibet Persen, Oceani filiam, Solis coniugem. Alia est genealogia, quam sequitur DIODOR. SICVL. *Lib. IV. p. 248. edit. Rhodom.* quam et nos supra assumimus.

Et iam bello Troiano, quod septuaginta annis ferius incidit, viuentem et ita vegetam fuisse, HOMERVS canit, vt non solum rei familiaris occupationibus satisfaceret, sed et amoribus indulgeret, et ad eos Vlysssem alliceret. Certe si hic tempora rursus ad calculos reuocemus, addamusque initiis belli illos decem annos, quibus durauit, et ex decem illis, quibus Vlysses vagatus est, nouem, quos colligimus ex HOMERI narrationibus; non minor centum tunc annis esse potuit, quum ex Vlyssse filium Telegonum, patris sui tandem interfectorem, conciperet. Pertinet illuc celebris quaestio: an herbarum viribus senium pelleret et iuuentutem sibi reddere potuerit? Poetae id quidem fingunt, quibus fidem adiungant alii, quibus placet. Mihi quidem haec est sententia, fuisse apud barbaras, quas Graeci vocabant, gentes antiquiorem aliquam medicinam empiricam, antequam Graeci feritatem exuerunt et bonis scientiis excolendis animum adiecerunt: idque testatum facere voluisse poetas, quando toties medicos MEDICASQUE commemorant, quibuscum versati Graeci aliquid de re medica fuerunt adepti.

§. XVIII.

Succedit CLEOPATRA, Aegypti regum ex Lagidarum stirpe vltima propago, et M. ANTONII, Triumviri Romanorum, qui libertatem rei publicae non mediocriter labefactarunt, sed funditus euerterunt, non postremi, amoribus celeberrima. ^{d)} Huius quidem studium maximum, quo illam medicae scientiae partem, quae venena, quotquot ore sumpta necant, aut ab animalibus morfu infliguntur, venata fuit, testatissimum facit PLVTARCHVS. ^{e)} Sed videtur fere non ante de illo multum ea cogitasse, quam vbi, suis et

ANTO-

d) vid. *diff. de M. Antonii Triumviri Timonio*, sub praesidio S. R. IOECHERI nostri superiori anno hic

habita, p. 14. f.

e) in *vita Antonii* p. 449. ed. Francof. cl. 1620.

ANTONII rebus in summam desperationem adductis, illam *commorientium societatem*; τὴν σύνοδον τῶν συναποθνήσκόντων instituerat. Atque hanc ob causam tanquam ὁψοδίδακτον eam et eo loco habendam esse decerneremus, quo ii, quibus desperatio ad medicinam aditum patefacit, haberi merentur, nisi PLINIVS ^{f)}) nobis succurreret, nosque doceret, quod non solum illa, quae desperati aut summe malitiosi quaerunt, calluerit, verum etiam ex interioribus artis chemicae pridem aliqua discere voluerit. Longam ac elegantem rei gestae narrationem apud ipsum auctorem legisse iuabit: ego rem in pauca conferam. Quum inter se certarent ANTONIVS et CLEOPATRA luxuriosis et sumtuosis conuiujs: CLEOPATRA aliquando inferri mensam secundam iubebat, in qua, ex praecepto, vnicum tantum vas posuerunt ministri, aceto plenum, cuius asperitate vique in tabem margaritae resolui possent. In illud detractum auribus suis immensi pretii vnionem merisit, liquatumque forbuit. Oportet sane haud vulgare illud acetum fuisse, sed artis destillatoriae ope paratum, ipsamque reginam iam ante experimentum fecisse, quoniam, sponsione ante facta, semet tam sumtuosis dapibus parandis obstrinxerat.

§. XVIII.

Haftenus ea in medium a me allata esse videntur, quae non omnino aliena a persona reginae existimari debeant. Enim vero supersunt, qui nomine eius circumferuntur, libri, quorum spurii natales non possunt non in oculos eorum, qui in critica versati sunt arte, incurrere. Sic exstant *de morbis mulierum* aliqua, quae in *harmonia gynaeciorum*, ^{g)}) auctore CASPARO WOLPHIO Tigurino publicata sunt.

C 3

Mira-

f) *Hist. Nat. Lib. IX. Cap. 35.*

apud Thom. Guarinum iunctim edi-

g) *Gynaeciorum Basil. cl. cl. LXXXVI. torum Tom. I. pag. 1.*

Miraberis haud dubie, in priori, quem nominaui, libro eandem inueniri praefationem, quae in THEODORI PRISCIANI commentatione, de eodem argumento praecipiente, legitur. Posteriori autem libro praefixum prologum percurrenti, a quocunque potius alio, quam Regina et CLEOPATRA, profectum id opus videbitur. Quis enim credat, Aegypti reginam Graecum opus in latinum conuvertere aut voluisse, aut valuisse? quis conuersum deinde sub iurisiurandi fide, ne ad alios perueniat, dari priuatae cuidam a regina exspectet? Putesne praeterea, hoc regium quiddam esse, de arcano, sub iurata fide credito, iactitare? Quin etiam descriptum illud populo tradere, vt memoria reginae scriptricis, beneficio huius artis, apud feminas non intermoriatur? Equidem nullus dubito, quin fictum reginae nomen in operis indice hac mente notatum sit, vt obscuriora isthaec tempora gratiam hinc aliquam et commendationem eidem conciliarent. Iam porro, quale pretium illis medicinis, quae sub CLEOPATRAE nomine apud GALENUM^{h)} citantur, ponendum sit, a nobis data opera dispiendum erit. Non temere alias illic inuenies, quam quae ad ornatum corporis faciunt, et quas κοσμητικὰς vocant medici. Quae quidem pleraeque omnes vt ineptiae sint: eripi tamen feminis curam cultus sui non posse, cum CORNELIO CELSOⁱ⁾ existimabimus. Solenne enim his esse solet, vt, dum moliuntur atque comuntur, annus sit.^{k)} Ceterum GALENVS promiscue atque indefinite tantum CLEOPATRAE cuidam talia tribuit, neque eius vel aetatem, vel patriam, vel eminentis dignitatis aliquam notam adiicit. Vt idcirco ad reginam CLEOPATRAM dicta eius reuocari cum certis rationum

h) Operum graece edit. Basil. sec. loc. lib. I. cap. I.

cl. l. XXXVIII. apud Cratandr. i) Lib. VI. Cap. 5.

Tom. II. p. 256. de compos. medic. k) Terent. Heautont. Act. II. Sc. I. v. 17.

num momentis non possint. AETIVS ¹⁾ eadem incerta enarrandi vsus est ratione. Quum vero reginis multae mulieres essent, quibus capillorum comendorum, faciei ornandae, et reliqui cultus corporis sui, cura commissa erat: non facile crediderim, ipsam reginam horas nobilioribus curis destinatas hisce vilioribus impendisse. Quocirca non inuitus, fateor, assentior iis, qui omne id genus scriptorum alii cuidam CLEOPATRAE tribuendum arbitrantur.

§. XX.

CYBELES, quam priscus error in deorum numerum recepit, variisque nominibus denotauit, tam est varia, tamque late patens, mythologiae portio, vt longus esset sermo nectendus, si referenda sint, quae apud plures auctores de hoc numine leguntur. Ego vero illos, qui talia recognoscere cupiunt, breuitatis causa nunc delego ad LIL. GREGOR. GYRALDVM. ^{m)} Aliquantulum magis conspicuam humanitatem eius ortumque proponit DIODOR. SICVLVS, ⁿ⁾ ex quo aliqua huc exscribam, vnde iudicari possit, num bene an male inter MULIERES MEDICAS referatur. *Natales, inquit, deae huius Phrygiae adscribuntur. Narrat deinceps, vt in monte Cybelo expositam et a feris nutritam mulieres inuenerint, et educauerint, atque deinde sic pergit: puella viribus et annis aucta, pulchritudine et continentia, ingenique vigore, mirifice excelluit. - - Ad haec pecorum et infantium morbos purgationibus abigere docuit. Ob singularem igitur diligentiam et beneuolae mentis affectionem erga pueros, quos per incantationem sanitati redderet et crebro in vlnis foueret, montana mater appellata fuit.* Inte-

1) Lib. VI. Cap. 56. Ed. Graec. Aldin.
p. 114. b.

ed. Lugd. Batav. cl. l. c. XCVI.
n) Bibl. Histor. lib. III. pag. 191. edit.
Laur. Rhodmanni.

m) Hist. deor. Syntagn. IV. p. 137. sqq.

Interius in historiam CYBELES nos ducit idem auctor,^o) quando Samothracum res antiquissimas prosequens, ostendit, Cadmi Phoenicis, eius, qui Thebas condidit, temporibus eam vixisse.

§. XXI.

DIANA, quae a Graecis Ἀρτεμὶς, Vpis, Hecate vocatur, ita fabularum tenebris oppressa est, ut eius vix historiam reperire liceat. Ita vero haec ipsa non minus ut MULIER MEDICA, quam numen medicum, prisco quidem errore fictum et cultum, hic locum sibi aliquem vindicabit. Sed et hic explicandae accuratius mythologiae negotium nobis non putamus datum esse. Hanc autem qui cupit, is abunde multum, quod hauriat, inueniet apud modo laudatum GYRALDVM.^p) Medica eius merita et officia paucis tradam ex PHVRNVTO:^q) *Hanc precantur sibi occurrere placidam parturientes, petuntque, ut sinus constrictos leuiter soluat, facilemque minusque laboriosum largiatur partum.* Et paulo ante haec scribit: *Finxerunt quoque veteres lunam, DIANAM, pollui;* cum quibus coniungo haec verba: *propter aliam causam parturientibus praeesse creditur.* Ex quo ita puto colligendum, veteres olim lunam, quam virginem vocabant, tempore nouilunii, quo non apparet, quasi menstruatam et pollutam feminam sibi finxisse, quae non audeat prodire, sed domi desideat. Vnde apud veteres non inusitatum est, ut menstruatae vocentur ἀποκαθήμεναι.^r) Qua voce sanctioris veteris foederis Codicis LXX, uti numerantur, interpretes vsi sunt, ubi in sacra lingua exstabat vocabulum, quod, omnes vocum Hebraicarum explanatores pollutum esse interpretantur. Plura de nominibus DIANAE, quae ad rem medicam

o) Ibid. Lib. V. p. 322.

p) Syntagmate XII. p. 356. seqq.

q) de natur. decor. cap. 34.

r) Leuitico. XV, 32. confer. cap. XX, 18. et Iesaeiae XXX, 22.

dicam spectant, vide, si placet, apud Celeb. SCHVLZIVM, qui et alios auctores, vt solet, indicauit. Antea diximus, dubium esse, vtrum herba Artemisia potius a DIANA, an ab ARTEMIDE, Cariae regina, nomen acceperit. Nunc illud tantum addimus, fuisse DIANAM, partus praesidem, nomine etiam *Lucinae*, Graeco *Ειλεθυίας*, quod HORATIVS^{s)} latine canens retinet, celebratam.

§. XXII.

ELEPHANTIS inter FEMINAS MEDICAS referri iam pridem meruit, quoniam aliqua scripta reliquit, quae ornatui corporis, et corrigendis vitiis, pulcritudinem naturalem corrumpentibus, inferuiunt. His quidem vti antiqui medici non dubitarunt, vt de *Sorano* testatum facit GALENVS.^{t)} Sitne haec eadem illa, a qua auctore lasciui isti libri, quos SVIDAS^{u)} attingit, profecti sint, equidem nescio.

s) *carmin. saecular. vers. 14.* vbi dubitari nequit, quin id nomen ad DIANAM pertineat, quoniam primo versu eam alloquitur.

t) *de compos. medicam. sec. loc. Lib. I. Cap. I. Sect. X.* Non possum, quin ad me excusandum, qui in turba MVLIERV MEDICARVM etiam comtrices et ornatrices numeravi, ex hoc auctore aliqua exhibeam, quae eiusdem libri Capite III. sect. III. leguntur: horum mentionem ob id feci, vt ostenderem, necessario quosdam etiam honestissimos viros talium sibi comitorum experientiam parare. Quando enim Archigenes haec scribere non est veritus, multo amplior venia Critoni danda est, qui in imperatoriis aedibus est medicatus. Interiectis deinde aliquibus ita pergit: *Quam-*

quam vel maxime cognita habeant smegmata corpori nitorem inducentia, itemque quae in virginibus mamillas conseruant, et quae impuberum puerorum testiculos ad multum tempus paruos conseruant, similiterque quae pilorum exortus cohibent: Verecundos tamen eiusmodi scribere, atque multo magis eas, quas Crito tradidit, conspersiones vestium aromaticas, odoratasque vestium infectiones, et aspersiones thalamorum et ambulacrorum: suffimentorum item omnis generis varietates, illitio- numque et vnguentorum. Extra enim medicinae documenta talia existunt.

u) In voce *Ἀσυνάσσω* de hac refert, quod prima varios coeundi et concumbendi modos inuenerit, et de

D

iisdem

scio. Neque sane propter hos eam in serie MULIERVM MEDICARVM, sed propter illos, quos primo loco nomi-
naui, libros in hoc censu eam saltem tolerandam esse, existi-
mo. Laudat CORNELIVS CELSVS v) elephantinum em-
plastrum, de quo ita scribit: *Est autem ea percandida com-
positio, ideoque elephantina nominatur.* Ex quo patet, id no-
men non esse ex eo, quod ELEPHANTIS illud emplastrum
inuenerit, sed quod candore ebur aequare videatur. Grae-
ci enim ebur ἐλέφαντα nominabant; id quod paucos fugiet.
Eandem longe grauissimi criminis ream PLINIVS w) agit,
quippe qui, artem pocula abortionis parandi illam docuif-
se, auctor est; quamquam id quidem homicidii detestandum
genus apud deorum cultores quibusdam in causis minus re-
prehendi solebat.

§. XXIII

EPIONE, quam Graeci ἨΠΙΟΝΗ scribunt, no-
men habet ab ἡπιός *blandus, lenis.* *Herculis filia et vxor*
Aesculapii fuisse perhibetur. PAUSANIAS x) *sanum Ae-*

scula-

iisdem scripserit: hanc vero postea
imitatas fuisse PHILAENIDEM et
ELEPHANTINEM, quae et ipsae
obscoena eiusmodi flagitia euulga-
uerint; quae paganis hominibus iu-
ste exprobrauit TATIANVS orat.
ad Graecos p. 122. edit. Oxon. c. l. c.
Videndum itaque, sitne ELE-
PHANTINE haec SVIDAE et
ceterorum ELEPHANTIS yna
eademque mulier. Esse sane, in-
de probabile fit, quia modo lauda-
tus TATIANVS PHILAENIDEM
et ELEPHANTIDEM con-
iungit. Si non sint diuersae; du-
bitari tamen posse videtur, an cer-
tum satis sit, quod eiusmodi libri
sint ab illis, quarum nomine in in-
dice denotantur. Notum est,

quanta iniuria facta sit ALOY-
SIAE SIGAEAE a quodam, qui
a se compositum impurissimum li-
brum honestissimae feminae at-
tribuit.

v) *Lib. V. Cap. 19. 24.*

w) *Lib. XXVIII. Cap. 7.* coniungitur
ibi cum Laide, parum honestae fa-
mae muliere. Est antiqua PLINII
editio Venet. MCCCXCVII impressa
per Bernardinum Benalium, qua hic
locus sic legitur: *quae Laïs et Cleo-
phantus inter se contraria prodide-
re de abortiuis, cetera.* Sed vix
dubitare licet, fuisse nomen ab im-
perito scriba deprauatum.

x) *Description. Graeciae Lib. II. Cap.*
XXIX. pag. 177. edit. Lips.

Aesculapii apud Epidaurios exstructum adducit, in quo ipsius dei et EPIONES signa fuerint, et de hac addit: EPIONEM uxorem fuisse Aesculapii memorant. Idem antea^{y)} meminit luci cuiusdam apud Epidaurios, in quo fuerit Dianae fanum et EPIONES simulacrum; quem locum interpretres male ita reddidit, ut EPIONES nomen cognomentum fuisse Dianae existimes, addita hac deriuationis ratione: ex eo fortasse, quod morbos mitigare hoc numen credatur. In epistola, quae HIPPOCRATIS operibus subiicitur,^{z)} tamquam a Senatu Populoque Abderitano ad Hippocratem missa, ut ad curandum Democritum adueniat, ista legimus: Ἰθὶ οὖν μετὰ Ἀσκληπιοῦ πατρὸς, Ἰθὶ μετὰ Ἡρακλέους, θυγατρὸς Ἐπιόνης. Quae quidem verba sic essent e Graeco in Latinum vertenda: Adesto igitur cum Aesculapio patre, cum Hercule, filia EPIONE. Sed praua est illius loci interpunctio, et de medio tollenda, ut conueniat adiunctae versionis: cum filia Herculis EPIONE.

§. XXIV.

FABVLLAM indici MEDICARVM MVLIERVVM iamdudum insertam inuenimus apud TIRAQVELLVM. Si mihi diligenter omnia circumspicienti fraudem non fecerunt oculi, nuspiam eam deprehendi posse existimo, praeterquam apud GALENVVM binis locis,^{a)} qui tamen, ut IANVS CORNARIVS^{b)} iam obseruauit, nescio quo casu, eandem rem iisdem fere verbis proponunt, ut non nisi pro unico haberi mereantur. Scribitur autem ibi in hunc modum: Μάλαγμα Ἀντιοχίδου ἐσκευάσθη Φαβίλλη Λιβυκῇ. Haec verba non vni interpretationi patent. Intelligi etenim potest mala-

D 2

gma

y) Ibid. Cap. XXVII. p. 174.

sect. III.

z) Edit. Geneu. clcIscLXII. p. 1274.

b) Commentar. in praedict. Lib.

a) Compos. pharmac. sec. loc. Lib.

GALENI pag. 546. edit. Froben.

IX. cap. 2. sect. VI. et Lib. X. cap. 2.

clcIscXXXVII. fol.

gma hoc ab ANTIOCHIDE, MULIERE MEDICA, paratum et adhibitum fuisse FABVLLAE LYBICAE. Sed et graecus sermo hanc explicationem admittit, esse hoc malagma ab ANTIOCHIDE inuentum, sed a FABVLLA frequenter in usum vocatum. Quod si priori sensu verba interpreteris, FABVLLA tanquam aegrotata, cui haec medela profuit, e mulierum in medicina vel docenda vel facienda occupatarum, numero excidit. Atque hoc sibi vult CORNARIUS, qui etiam vocabulum Λιβυκή sollicitat, legendumque putat Λιβία, latine *Liuiæ*. Atque licet ipsi in hoc posteriori assensum facile praebuero; quum nominis Romani maiorem similitudinem sic intueri videatur: nondum tamen inuenio, quid nos cogat, verba Graeca ambigua eo sensu explanare, vt FABVLLA ex indice MEDICARVM MULIERVM eximenda sit.

§. XXV.

Vocat nos ad se femina honestissima et nobilissima inter Gallos stirpis, FOVQVETIA, cuius industriae debemus librum elegantem et lucernam olentem. Collegit enim et in vnum volumen redegit, quae parabilia ex domesticis rebus omni morborum ingruentium generi opponi possint, remedia, atque his experimenta varia, quorum successus notauerat, addidit et in commentarios suos retulit, qui ita inscribuntur: *Recueil et Suite des Remedes faciles et domestiques, choisies, experimentez et approuvez par toutes sortes des maladies internes et externes et difficiles a guerir, II. Tomes a Paris c1c1cccI*. Saepius ab eo tempore in Gallia et apud Batauos repetitum est hoc opus, et in Germanicam etiam linguam translatum ^{c)} prostat.

§. XXVI.

c) Verba, quae librum indicant, haec sunt: *Artzney - Buch nützlicher Häuß-Mittel und bewährtester Medicamente vor allerhand Kranckhei-*

ten nebst einem Tractat von der Milch-Cur, aus dem Frantzösischen. Dresden c1c1cccVIII, 8uo.

§. XXVI.

De HECATE nos dixisse videri possumus, quum de DIANA sermo nobis esset. Sed alia fabula HECATEN filiam facit *Persae, Solis filii*, quae deinceps *Aeetae Colchorum regi* nupta mater *Circes et Medae* facta sit. De ea sic reliquit scriptum DIODORVS SICVLVS: ^{d)} *Ex Persa HECATE genita est, audacia et immanitate patrem anteueniens. Venationi enim dedita, si nihil praedae caperet, pro bestiis homines iaculis conficiebat. In mortiferis quoque pharmacis solerter componendis exercitata, aconitum, quod vocant, inuenit. Ac de cuiusque natura et efficacitate ita experimentum cepit, si cibis hospitum illud admisceret. Hinc magnam consecuta peritiam, primo patrem veneno exstinxit, sibi que regnum usurpauit: deinde fanum Dianae exstruxit, ad quod hospites nauibus appulso pro victimis deae sacrificari instituit; crudelitatis nomine ubique celebris. Aeetae postea nupta, duas ei natas, CIRCEN et MEDEAM, filiumque Aegialeum peperit. Alii aliam originem ipsi assignant, patrem quidem tribuentes Iouem, matrem modo Asterien, modo Cererem, mox Proserpinam, et, quas non alias? Equidem has lites componere non audebo, sed nulli non spondeo, me suo quemque sensu abundare facile pati. Liceat mihi talia cupientem remittere ad saepius laudatum LIL. GREG. GYRALDVM, ^{e)} aut NATALEM COMITEM. ^{f)} Nobis sufficit indicasse, quod Graeci fere ita consueuerint, vt HECATES opera omnia atrocia et terribilia describant; DIANA vero magis humana et salutaria. Hinc veteres in arte venefica ad summum excultam sic describunt cum TIBULLO: ^{g)}*

D 3

Sola

d) *Bibl. Histor. Lib. IV. pag. 248. edit.*

seqq.

Rhodom.

f) *Mythol. Lib. III. Cap. XV.*e) *Hist. Deor. Syntagm. XII. pag. 356.*g) *Eleg. II. Lib. I. v. 52.*

Sola tenere malas Medae dicitur artes:

Sola feros Hecates perdomuisse canes.

Quod autem a DIANA sit nomine quidem, non vero ipsa re diuersa, et tantum pro varia gentium vel magis barbararum vel magis cultarum persuasione per multorum ora volitauerit: cum ex multis probari potest, tum maxime ex VIRGILIO, qui ita canit: ^{h)})

Tergeminamque Hecaten, tria virginis ora Dianae.

§. XXVII.

HERCYNE inter Boeotios eodem loco habebatur, quo apud alias Graecorum gentes *Hygea*, quemadmodum ipsis pro *Aesculapio* fuisse videtur *Trophonius*, qui HERCYNES fuisse dicitur maritus. Obseruauit hoc SCHVLZIVS ⁱ⁾) quod in tota Boeotia nec vnicum fanum aut simulacrum *Aesculapii* commemoretur: quum in reliqua Graecia vix mediocre oppidum sine his fuerit. Simulacra *Trophonii* et HERCYNES faciebant, vt essent *Aesculapio* et *Hygeae* simillima, teste PAVSANIA, ^{k)}) et in antrum *Trophonii* somniorum ac oraculorum causa descendebant. *Trophonium* istum esse *Mercurium*, CICERO ^{l)}) nos docet. Quod autem

h) *Aeneid. IV. v. 512.*

i) *Hist. med. pag. 128. §. 10. 12.*

k) *Lib. IX. Cap. XXXIX. pag. 789.*

l) *de nat. deor. III. Cap. 22.* Ex eodem libro, et capite eius 19. petimus fundamentum HERCYNEN, quae pro numine culta fuit, inter MULIERES etiam MEDICAS referendi. An, inquit, *Amphiarus deus erit, et Trophonius?* nostri quidem publicani, cum essent agri in Boeotia deorum immortalium excepti lege censoria, negabant immortales esse illos, QUI ALI-

QUANDO HOMINES fuissent. Facile apparet, eandem, quae de marito, etiam de vxore rationem valere debere. Contra CICERONEM, qui *Trophonium* et *Mercurium* eosdem facit, sentire videtur PHILOSTRATVS de vita Apollonii Tyan. *Lib. VIII. Cap. 19.* quando *Trophonium* Apollinis filium dicit. Sed mea nunc parum refert, quicquid de hoc cuiquam placuerit, quippe quum non tam de *Trophonio*, quam de HERCYNNE, nunc dicendum fuerit.

autem HERCYNE minus litterarum monumentis celebratur, quam *Hygea*, hanc causam esse puto, quia cultores habuit Boeotios, homines tantum non omnes pingui et crasso ingenio, et a litteris alieniores.

§. XXVIII.

Accedimus ad nobilissimam feminam Germanicae pro-
sapiae, praecipuo loco natam, et optime educatam, quae
HILDEGARDIS vocatur. Haec mature semet virgini-
tati perpetuae consecrauit et claustrorum monialium legi-
bus sese adstringi passa est, ut pietatis quotidiano exercitio,
bonarumque litterarum, quibus vnice delectabatur, studiis
colendis tanto quietius vacare posset. Sanctum vitae insti-
tutum, et conspicua inter omnes doctrina, eam tantopere
commendauerunt, ut et viua ab omnibus suspiceretur, at-
que sacrarum virginum, quae S. RUPERTI coenobium
prope *Bingiam*, quam olim *Pinguiam* scribebant, incolunt,
Antistes esset, et morte tandem defuncta inter sanctos re-
ferretur. Vita decessit A. P. C. N. CIOCLXXX. Reliquit in-
genii sui et industriae monimenta varii argumenti: sed ad
nos maxime pertinent libri eius IV *de rerum natura*, qui
saepius formis descripti sunt. In his, PLINII exemplo,
sicuti titulus eius editionis, quam nouissimam puto,^{m)} indi-
cat, variis de rebus naturalibus praecepit, ut *de elementorum*,
fluminum aliquot Germaniae, metallorum, leguminum,
fruticum, herbarum, arborum, arbustorum, piscium, volati-
lium, et animantium terrae naturis et operationibus.

§. XXIX.

m) Ea prodiit Argentorati apud Io-
hannem Schottum c1515 XLIV.
fol. Vidi antiquiorem saeculo
XV emissam. De antiquiore qua-
dam S. HILDEGARDE, CA-
ROLI M. coniuge, vide apud

CARPZOVIVM de *medicis ab*
ecclesia pro sanctis habitis §. XV.
p. 17. et BRVSCHIVM in *chro-*
nolog. monasterior. German. p. m.
95. seqq.

§. XXIX.

HYGIA, quae et HYGIEIA Graece Ὑγία scribitur, inter *Aesculapii* filias omnium maxime nominata est, et quam saepissime in veterum libris occurrit. Nusquam certe obferuabis, in recensenda huius numinis familia hanc filiam omitti. Saepissime in numis et gemmis sola parenti adiungitur. In iure quidem iurando *Hippocratis* initiandus sacris medicinae, per *Apollinem*, *Aesculapium*, HYGEAM et *Panaceam* iurat, ac fidem suam adstringit praeceptori. Amplissimus hic nobis sese aperit campus differendi: sed me propositae breuitati studere oportet. ARISTIDES HYGEAM seorsim, prae sororibus, sic commendat: ⁿ⁾ ἡ πάντων ἀντίδοτος ἡπίων, ἧς δὴ παῖδες ἐπώνυμοι: quae instar omnium numinum ob humanitatem celebratorum est, et filios habet a se cognominatos. Videtur mihi sane illud frequentissimum appositum Φιλάνθρωπος, ante oculos positum habuisse, cuius vim et vsum eruditissima dissertatione euoluit celeberrimus Altorfinae academiae polyhistor, CHRISTIAN. GOTTL. SCHWARZIVS. ^{o)} Illud autem de filiis eponymis, seu deae HYGEAE cognominibus, deducendum mihi videtur ad Hygienos, ὑγιεῖνός, id est, medicos publica auctoritate gymnasiis praefectos, ut hominibus, qui boni habitus comparandi causa isthic exercentur, consiliis rectis adsint. De his videndus est medicus omnis antiquae doctrinae consultissimus, ANTONIVS VAN DALE. ^{p)} Eadem ne sit HYGEA Graeco-

n) Operum a Paul. Stephano editorum Tom. I. p. 82.

o) de AESCVLAPIO et HYGEA diis Φιλάνθρωποις. Altorfii c13lcccXXV, cuius §. XIII. et XIV. de HYGEA seorsim tractant.

p) Dissertationum antiquitatibus et marmoribus illustrandis inseruientium octaua, Cap. VIII. ex qua pau-

cula haec apponere liceat: medicus, quatenus medicus, ad solos fere aegrotos pertinet, ipsorumque vitae conseruationem, sanitatisue restitutionem curat: ὑγιεῖνός vero ad athletas, ut ipsorum bono colori, habitui ac robori augendo ac conseruandis prouideat, hincque illorum dietae moderetur.

Graecorum ac Romanorum *Salus* dea; disputatum est a
SALOM. CELLARIO. ^{q)})

§. XXX.

Quod in HYGEA nobis prouidendum fuit, ne dicendorum multitudine obrueremur; idem ne fiat de ISIDE, nunc exposituro cauendum mihi esse video. Tam multa enim nobis de hac MULIERE MEDICA, numinibus a superstitiosa posteritate adscripta, apud DIODORVM SICVLVM, ^{r)}) PLVTARCHVM, ^{s)}) GISBERTVM CVPERVM, ^{t)}) OLAVM BORRICHIVM, ^{u)}) et historiae medicae auctores, DAN. CLERICVM, SCHVLZIVM, nec non apud medicorum principes, GALENVM, AETIVM ac PAVL. AEGINETAM, conseruata sunt et in medium allata, vt amplissimam scribendi materiam omnino haberet, qui singulari libro tractare de ea vellet. Ne itaque verbosius hoc fungamur labore, ex DIOD. SICVLO paucula huc transferemus: *ISIN multa sanitati hominum pharmaca inuenisse, Aegyptii tradunt, utpote quae scientiae medicae fuerit peritissima, adeoque multa solerter excogitasse.* Habuisse eam in hoc studio adiutorem gnarum et industrium *Hermetem* tradunt, qui usque adeo in interiora artis adyta penetrauerit, vt et ipsa interiora chemiae sacra panderet reginae et Aegyptiorum sacerdotibus, qui praecipue his digni viderentur. Id vt vero simile reddat, maxime laborauit BORRICHIVS. Post mortem diuini honores ipsi habiti sunt, quos meritis non solum in Aegypto tuita est, verum etiam ita amplificauit, vt ipsi per omnem

q) *Antiquitat. medic. Cap. III. §. 8.*

r) *Bibliothec. Historic. Lib. I. pag. 22.*

s) *Libello de Iside et Osiride.*

t) *in elegantissimo tractatu de Harpocrate.*

u) *in Hermetis et Aegyptiorum sapientia vindicata.*

omnem Graeciam, quin Romae etiam, cultus diis debitus exhiberetur. Iterum DIODORI utar testimonio: *nunc quoque ad immortalitatem elata, sanatione hominum maxime gaudet, et in somnis, si quis opem expetierit, manifestam numinis praesentiam promptamque indigentibus bene merendi facultatem exhibet. In hoc asserendo totius prope orbis testimonio se niti, qui effusis deam honoribus, ob praesens in medicando numen, remuneretur.*

§. XXXI.

Atque haud fallit DIOD. SICVLVS, quando de ISIDIS, et qui fere cum ea semper coniungitur, *Serapidis* cultu longe lateque diffuso scribit. Postquam enim temporibus regum *Ptolomaeorum* Aegyptus commerciis externarum gentium aperta fuit; religio etiam haec in illas praecipue vrbes, quas naues plurimae adire solebant, inuehi coepit. Indicem earum exhibet SCHVLZIVS. ^{v)} Romae etiam fuisse ISIDIS cultum, fat multis testimoniis confici facile posset, numorumque fide confirmari, si in eo nunc in primis nobis elaborandum putaremus. Sed vix animum induco, illum saeculo P. C. N. primo publice permissum fuisse: de *Commodo* quidem Imperatore certum est, quod sacra ISIDIS colendo AVCTOR PIETATIS haberi voluerit, teste IO. VAILLANTIO. ^{w)}

§. XXXII.

Sequitur LAIS, quae nescio, sitne eiusdem ordinis et existimationis, quam quidem *Elephantis* meruit, de qua supra diximus. PLINIVS ^{x)} ambas coniungit. Quod si fuit eadem, faci-

^{v)} *Hist. med.* p. 40. 41.

^{w)} *Numism. Imper. Tom. II. pag. 190.*
ubi numus cum hac inscriptione adducitur.

^{x)} *Lib. XXVIII. Cap. 7.* SVIDAS non aliam nouit LAIDEM, nisi illam meretricem, cuius extrema fata refert voce *χελώνη*.

facile patiemur, eam excludi ex ordine MULIERVM MEDICARVM; praesertim quum non adeo magni momenti sint, quae ex eius scriptis citata legimus, et superstitionem pleraque sapiant.

§. XXXIII.

Vidi etiam LEOPARDAM quandam laudatam inter feminas, quae morborum remedia calluerunt et alios docuerunt. Auctor mihi est OCTAVIVS HORATIANVS, ^{y)} qui inter hydropis remedia posuit vnum, quod ex corde lupi parandum sit. Cuius conditionis ea fuerit, non licet cognoscere: forte non melioris, quam illa, quae mox sequitur, nomenclatoris vxor, a qua acceptum itidem ad hydropem medicamentum ibi legitur.

§. XXXIIII.

Progredimur nunc ad exponendum de femina longe celeberrima, MARIA SIBYLLA MERIANA, quae amore historiae naturalis, et excellenti dexteritate in pingendo aerique imagines incidendo, nomen immortale consecuta est, totque monumentis, aetatem, vt conicio, laturis, per omnes bibliothecas celebratur, vt de immortalitate memoriae suae satis secura esse possit. Et quamquam haec mulier nobile studium non ad formae emendationem, aut obstetricias artes, aut hydropis, febrium, scabiei, curationem conuertit, sed naturae miracula in generatione et transformatione insectorum, aliaque, quae ad hanc indagationem pertinent, scrutari et perquirere maluit: existimo tamen, locum ipsi in choro medicae societatis amplissimo ex iure, vt sic dicam, praescriptionis esse relinquendum. Nam quum philosophiam naturalem ex libris tantum et repetitione eo-

E 2

rum,

y) Lib. IV. ad EVSEBIVM filium,
pag. 88. edit. Argentorat. apud Io-

ann. Schottum c 1515 XXXII.
fol.

rum, quae antiquiores dixerant aut scripserant, philosophi cathedrarii quondam traderent, experimenta autem ulterio-
ris indagationis causa facere superuacaneum putarent: iam
pridem factum est, ut anatome, ^z) et ad hanc pertinentes
inquisitiones naturae, itemque philosophia per ignem seu
chemia, desertae a philosophis, apud medicos liberaliter ex-
ceptae habitarent, ipsorumque familiae adscriberentur. Per-
fecit certe MERIANA nostra idem negotium, quod me-
dici primi ordinis celeberrimique nominis, MALPIGHIVS,
SVAMMERDAMIUS, VALLISNERVS: neque illorum scri-
ptis innutritus quisquam dubitabit, magnam sane copiam
optimarum doctrinarum ex isto studio ad physiologiam, at-
que in primis ad negotium generationis rectius introspecien-
dum, fuisse nostro aeuo collectam; neque pathologiam ca-
rere istiusmodi doctrinis posse, manifestum cuique erit, qui
in votis habebit, ut helminthologia satis intricata certior ali-
quando euadat.

§. XXXV.

Sed redeundum est ad MARIAM SIBYLLAM
MERIANAM, quae Francofurti ad Moenum in lucem
edita est, patre MATTHAEO MERIANO, celeberrimo chal-
cographo. A prima aetate ingenium manumque exercuit
pingendo et caelando, atque in primis delectata fuit, quum
mirabiles metamorphoses bombycum, earum ex ouulis exi-
guis generationem, incrementa, mutationem in chrysalidem,
hinc in papilionem contemplaretur. Non solum itaque tam
diuer-

z) Satis clarum est testimonium MA-
CROBII *Saturnal. VII. Cap. 15.* qui,
Plato, inquit, dum nec anatomica,
quae medicinae propria est, abstinet,
risum de se posteris tradidit. Enim-
vero disciplina anatomica, si nar-

rationes de fabulosis et obscuris
temporibus demimus, primos cer-
tos et indubios auctores habuit
philosophos, ut *Alcmaeonem, Em-
pedoclem, Aristotelem.*

diuerſas, quae paulatim accidunt, mutationes delineauit in bombycibus, verum etiam ad plura erucarum et papilionum genera, quotquot ipſi Germania offerebat, contulit induſtriam, nitide omnia depinxit, aeri incidit, viuiſque coloribus omnia induxit, addita deſcriptione, qua ea declararet, quae vel penicillum, vel caelum non ſatis exprimere valebant. Matrimonii deinceps iura ſubiit, idque celebrauit cum celebri pictore Norimbergenſi, GRAFIO, quocum XX. annos vixit, duarumque filiarum, ſtudiis iisdem celebrium, mater facta eſt. At enim vero fugit me, quas ob cauſſas maritum deſeruerit, et, ſecum abductis filiabus, *Labadiſtarum* factioni in Belgii foederati prouinciis ſeſe adiunxerit; vnde nec mariti precibus, nec magiſtratus opera, reuocari vnquam potuit. Nouus interim hic commorationis locus fauebat ſtudiis eius, quum infinitam inſectorum varietatem ex vtraque India allatorum in muſeis curioſorum inueniret. Tantum autem aberat, vt conſpectus illorum fatiare eam poſſet; quum fere papiliones tantum videret, animalia autem ipſa, vnde ortum traxerant, deſideraret, neque gradus mutationis intueri et obſeruare poſſet. Inflammata igitur tot res curioſas et vtilis venandi ſtudio, conſilium cepit, longum ac periculi plenum iter ad Indiam occidentalem ſuſcipiendi, prouinciam Surinamenſem ſibi fixum deligebat domicilium: ſed calores illius regionis vehementiſſimos quum diu perferre non poſſet, reditum ad Europaeos, multis ſcientiae adamatae ſubſidiis locupletata, maturauit. Ne vero deeſſent, a quibus acciperet perpetuum ſuae induſtriae cotem ac fomitem, et per amicos ſibi quotannis noua ſubmitti curabat, et cupide arripiebat oblatam occaſionem alterius ex filiabus Surinamenſi ciui collocandae, vt per hanc a ſe formatam diſcipulam acciperet, quae coram obſeruare ipſi non liceret. Vltimam aetatem, quam ad LXX annos perdu-

xit, affligebant varii morbi, a quibus tandem A. c1010ccxvii auferebatur, filiae alteri, DOROTHEAE MARIAE HENRICIAE, relicto negotio, vt imperfecta opera ad editionem perduceret. ^{a)}

§. XXXVI.

Sequuntur aliquae, de quibus, quae referam, non multa habens, eorum sola fere nomina recitabo. Est MARIA quaedam MEVRDRACIA, cuius studium in iuuando humano genere, per inuenta chemica auxilia, comprobatur libellus, qui exstat. ^{b)} MAIAM laudat GALENVS, ^{c)} et

AE-

a) Secuti hic potissimum fumus *no-ua litteraria*, quae in hac vrbe, magno rei publicae commodo, a multis iam annis eduntur, et quidem ea, quae lingua vernacula in lucem exeunt. Videantur ibi *Ann. c1010ccxvii. pag. 178.* et addantur, quae ad emendationem hic scriptorum adduntur eiusdem anni *pag. 767.* Ab aliis multa omnino falsa de hac femina scripta sunt. Sic C. F. PAVLLINVS in libello *de doctis mulieribus* eandem scripsit filiam fuisse celeberrimi medici MARIANI GRAFII: qualis medicus nunquam in orbe fuit. Primis suis libris ex more praemisit cognomen a marito acceptum: postquam autem eum deseruit, neque nominari ab illo voluit amplius, sed patris sui nomine censeret. Meum non est diiudicare causas diffidii, quod inter coniuges ortum nunquam reconciliari potuit. Vero tamen simile est, GRAFIVM pictorem, cui a iudicio rerum matrimonialium in inclyta re publica Norimbergensi permisum fuit, vt aliam coniugem du-

ceret, innocentem fuisse; nec non mendacio confictam esse accusationem, quod ob facinus aliquod fugere ex patria debuerit, quum nihil certius sit, quam quod in patria vrbe semper manserit, et inter ciues honestiores habitus fuerit. Scripta feminae non solum Germanica lingua prostant, sed in Belgicam etiam et Gallicam, quin Latinam, aliqua translata sunt. Primum scriptum emisit *c1010ccLXXIX.* alterum *c1010ccLXXXIII.* Nouissimorum aut recusorum notitiam praebent laudata *no-ua litteraria.* Vide *A. c1010ccxxvi. pag. 906. Ann. c1010cccxxix. pag. 817.* et *Ann. c1010cccxxxi. p. 595. et 622.*

b) En indicem libri: MARIAE MEVRDRAC *mitleidende und leichte Chymie nebst Iohann Musfatz Tractat von wohlriechenden Sachen. Franckf. c1010ccLXXXIX. 24. et c1010cccXII. 12.*

c) *de compos. medicam. sec. gen. lib. V. pag. 389. edit. Gr. Basil.* Esse autem nomen aliquod MAIAM proprium

AETIVS.^{d)} Quum vero graecum nomen *μαία* obstetricem denotet, et non satis clarum sit ex GALENO, num voverit aliquam feminam hoc nomine insignitam laudare, an obstetricem, cuius nomen aut non succurrebat, aut non dignum iudicabat; AETII vero graecum codicem inspicere non liceat: rem in medio nos relinquere oportet. MARIAM etiam, quae et MIRIAM dicitur, *Mosis* sororem crebro iactant chemici scriptores, tanquam arcanioris artis, quae metalla emendat et perficit, participem et magistram.^{e)} Scripta eius admodum sunt exiguae fidei. MARGARETAM quoque aliquam in medicorum veterum numero apud TIRAQUELLVM^{f)} legimus, cui *Ladislaus Neapoleos* rex, A. cccccXIV. extinctus, quod medicae artis esset peritissima, potestatem fecerit eius periculum faciendi. Cuius rei testes litteras se vidisse scribit, eodem TIRAQUELLO teste, MATTHAEVS DE AFFLICTIS in *constitutiones Siciliae*.

§. XXXVII.

Ordo nunc postulat, vt de MEDEA, apud veteres decantatissima MULIERE MEDICA, dicamus. Soror fuisse dicitur *Circes*, de qua supra egimus. DIODORVS SICVLVS nos ita de MEDEA docet:^{g)} *de vniuersa pharmaceorum facultate a matre atque sorore edocta, plane contrariam*

prium et muliebre, satis ex eo constat, quod antiquitas *Mercurium Iouis* ex MAIA filium dixit. Videatur CICERO *de natura deor.* III. 22. PHVRNVTVS *de natura deor.* p. 167. edit. TH. GALE *Amstelod.* cccccLXXXVIII. LIL. GREGOR. GYRALDVS *hisor. deor. syntagn.* IX. MACROBIVS *Saturnal.* I. Cap. XII. DIODORVS SICVLVS *Bibl.*

Hist. Lib. III. pag. 104. edit. Rhodom. apud quem nomen scribitur *Μαία*.

d) *Tetrabibl. III. Serm. II. C. 3.*

e) Videatur LAMBECIVS *Prodr. Hist. lit. Lib. II. Cap. II. p. m. 154.*

f) Vide illum indicem a Celeb. FABRICIO exhibitum bibliothecae Graecae Volum. XIII. pag. 320.

g) *Bibl. Histor. Lib. IV. pag. 249. et 253. edit. Rhodom.*

riam usus rationem instituit. Nam perpetuo in hoc operam dedit, ut appulsos illuc hospites e vitae periculo eximeret. Nolo multis repetere, quae cum Argonautis egerit, et quomodo Iasoni nupta in Graeciam venerit, quaeque de eius facinoribus tragici poetae fidem omnem excedentia fabulentur. In primis eximium peritiae medicae specimen coram perfido praebuit *Pelia*, qui amasii sui *Iasonis* familiam cum stirpe deleuerat, quamquam fabularum auctores multa portentosa rei gestae addiderunt. Legat illa, quisquis cupit, apud ipsum, quem laudauimus, auctorem. Explicationem adscribam, quam PALAEPHATVS tradidit: ^{h)} De MEDEA, ut ferunt, homines recoquente atque ex senibus faciente iuuenes, res ita accidit. Prima illa eiusmodi florem inuenit, qui et albos reddere capillos, et nigros, posset. Atque ita qui pro albis nigrificantes adamarent, efficiebat, ut habere viderentur. Inuentis etiam a se balneis, caloribus fouebat volentes, non tamen in publico, ne quis medicorum artem addisceret. Huic rei nomen erat decoctio. Cum itaque per istiusmodi fomenta agiliores fierent homines, sanioresque, viso apparatu, lebetibus scilicet, lignis et igni, utique cocturam illam veram existimabant. Sed ea similiter usus *Pelias*, vir senex et debilis, vitam perdidit.

§. XXXVIII.

Singulare est, quod MACROBIUS ⁱ⁾ addocet, quosdam existimasse, MAIAM, Mercurii matrem, eandem esse MEDEAM,

^{h)} de incredilibus Hist. Cap. XLIII. pag. 54. edit. TH. GALE Amstelod. suo. His congrua legimus apud IO. STOBÆVM Lib. XXIX. pag. 207. edit. Basil. cl. cl. XLIX. f. Diogenes Medeam dicebat sapientem, non veneficam fuisse. Acce-

ptis enim mollibus et effeminatis hominum corporibus, confirmasse ipsa gymnasiis ac exercitiis, et robusta vigentiaque reddidisse: hinc famam emanasse, quod coquendo carnes in iuuentutem restituerit.

ⁱ⁾ Saturnal. Sermon. Lib. I. Cap. XII.

DEAM, eandemque BONAM DEAM, FAVNAM, OPEM, FATVAM. Qui in eam opinionem adducti sunt, hi eo potissimum nituntur argumento, quod in aede eius omne genus herbarum fuerit, ex quibus antistites plerumque medicinas dederint: et quod templum eius viro introire non licuerit, propter iniuriam, quam ab ingrato viro *Iasone* perpeffa sit. Plura et abunde multa de MEDEA cupientem remitto ad NATALEM COMITEM.^{k)} OENONEN tanquam vaticinandi peritam, legendarumque herbarum gnaram, celebrat CONON, cuius librorum summam nobis conseruavit diligentissimus PHOTIVS.^{l)} Eandem se iactantem ista peritia nobis sistit OVIDIVS.^{m)} Oportet, eam vixisse tempore belli Troiani, si vmquam vixit, et non tota est fabulosa. Succedit OCYRRHOE filia *Chironis* Centauri, de qua nos idem OVIDIVSⁿ⁾ edocet:

Ecce venit rutilus humero protecta capillis

Filia Centauri, quam quondam nympa Charido,

Fluminis in rapidi ripis enixa, vocauit

Ocyrhoen.

NATALIS COMES^{o)} existimat, *Chironi*, medicinae Chirurgicae inuentori, hanc filiam ideo a vetustate fuisse attributam, quoniam haec ars necessario viam corruptis aperiat humoribus: et quum, quo citius hi et commodius defluerint, eo citius vulnus sanetur.

§. XXXVIII.

OLYMPIADEM Thebanam inter MULIERES MEDICAS refero, fide C. PLINII,^{p)} historiae naturalis conditoris, et alterius cuiusdam, fretus, quem VALERIANI^{q)} cognomine

k) *Mythol. Lib. VI. Cap. VII. integro.*

l) *Codice 186. pag. 434. edit. Rothomag. fol.*

m) *Heroid. V. epistola ad Paridem.*

n) *Metamorphos. Lib. II. v. 636. seqq.*

o) *Mythol. Lib. IV. Cap. XII.*

p) *Hist. nat. Lib. XX. Cap. XXI.*

q) *de re medic. Lib. IV. Cap. V.*

ne noscimus. Vterque iisdem fere verbis ex eius fide refert, abortiuas esse maluas cum adipe anferis. Prior etiam alia ab ipsa accepit, inque suos libros retulit ^{r)}) medicamenta, mulierum affectibus destinata omnia. Vnde cognoscimus, quod de sui sexus valetudine praecipue fuerit sollicita. Quoniam a GALENO, aliisque Graecis, non citatur, Latino vsa esse videtur sermone in scribendo.

§. XL.

PALLADEM, quam MINERVAM Latini vocant, in hoc MULIERVM MEDICARVM indice, vel eo nomine collocare me oportet, quod ei omnium bonarum artium inuentio et tutela tribuitur. Originem fabulosam non attingemus. Praecipue colebatur ab Atheniensibus, qui ipsi seorsim tribuebant tuendae valetudinis et morbos profligandi beneficium. Huius documentum dedisse scribitur a PLYTARCHO, ^{s)}) quum *Periclis* temporibus templum eius in arce aedificaretur, et operariorum promptissimus super altitudinem fastigii repisset, ac inde cecidisset. Demonstravit enim *Pericli* in somnio herbam, cuius ope is homo conualuit. Eiusdem historiae meminit PLINIVS, ^{t)}) qui herbam illam perdicium siue parthenium vocari, a Latinis vrceolarem, docet. Atque idem auctor MINERVAE tribuit, quod vitem, quae Chironia alias vocatur, inuenerit, ^{u)}) quodque suum etiam miserta, his repererit medicinam, quam quisquis fodere cupiat, efficacem non aliter reddat, quam si verba addat: haec est herba argemon, quam MINERVA reperit suibus remedium, qui de illa gustauerint. ^{v)})

§. XLI.

r) *Hist. nat. Lib. XXVIII. Cap. IX.* bis laudatur, adduciturque medicamentum externum, quo menstruae purgationes cieantur, et aliud, quo sterilitas ob partus vexationem inducta emendari queat.

s) *in vita Periclis pag. 160. edit. Francof. MDCCXX.*

t) *Hist. natur. Lib. XXII. Cap. XVII.*

u) *Ibid. Lib. XXV. cap. IV.*

v) *Lib. XXIV. cap. XIX.*

§. XLI.

Athenienses illud praesens in medendo numen colere statua aenea in arce posita iuxta aram, quam ante inemorant ibi fuisse; rursus teste PLUTARCHO, ^{vv)} qui Graecum nomen prodit ὕγείας Ἀθηνᾶς: quod idem confirmat HARPOCRATION. ^{x)} PAUSANIAS ^{y)} de simulacro HYGEAE MINERVAE testis est, sua aetate Athenis viso: ut et de MINERVAE SOSPITAE ara in Achaonana Atticorum curia. ^{z)} Atque idem MINERVAE PAEONIAE signum Athenis commemorat. ^{a)} Nec vero alii defuerunt populi, qui MINERVAM MEDICAM suspexerunt. In his Nicaeenses. IO. HARDVINVS de numis horum differens, ^{b)} addit: ὙΓΕΙΑ ΚΑΙ ΑΣΚΛΗΠΙΩ ΝΙΚΑΙΕΙΣ *Hygiae et Aesculapio Nicaeenses.* Numus hic *Hadriani* ex cimelio Reginae *Christinae* sumtus est. Idcirco autem *Aesculapius* et *Hygia* simul hic depicti exhibentur, et *Aesculapii* filia *Hygia* est habita, quod *Aesculapii* nomine, *Iouem* antiqui, *Hygiae* vero, *Minervam* intellexerint, *Iouis*, ut narrant fabulae, filiam, quam et MEDICAM nominarunt, ipsumque *Iouem Salutarem*, ut esset idem ζεὺς σωτήρ, qui Σωτήρ Ἀσκληπιός. Vetus inscriptio apud IANVM GRUTERVM p. MLXVII. n. 3. MINERVAE MEDICAE, et n. I. MINERVAE AVG. L. CALLIDIUS PRIMVS AVRES ARGENTEAS V.S. L. M. Nimirum ob sanatam aurium grauitatem aures ille ex argento

F 2

confe-

w) in vita Periclis l.c.

x) Libro de vocibus in Ὑγία.

y) Lib. I. Cap. XXIII. positam scribit ad latus, Hygeae, Aesculapii filiae, cuius nomen scribit Ὑγία. Sed Minervae sospitae, Ὑγία.

z) eodem libro Cap. XXXII.

a) Ibidem cap. II. Positam fuisse di-

cit ante porticus, quae a porta ad Ceramicum ducente erant posita. SCHVLZII Hist. med. p. 74. Et conf. SPANHEMII obseruat. ad Callimachi hymnum in Pallad. p. 609. vbi illustris auctor plures, ut solet, alios locos huc retulit.

b) vid. Numi antiqui populorum et urbium illustrati p. 221.

confectas donarii loco MINERVAE suspendit, *Votumque Soluit Lubens Merito.* Et fuit Romae MINERVA MEDICA, regione Urbis quinta; ut quidem P. Victor prodit. Vid. quae Cl. PETRVS ZORNIUS hac de re in medium attulit. ^{c)}

§. XLII.

Dubius sum et anceps, quid statuendum mihi sit de PAMPHILE *Epidauria*, cuius SVIDAS ^{d)} meminit vna cum elogio sapientis. Scripta eius grauis sunt argumenti et utilis omnia: ut *commentarii historici libris XXXIII. epitome Ctesiae libris III. Epitomae historiarum*, aliorumque librorum quamplurimae, ut et *de controuersis*. Quibus moueor, ut et librum *περὶ ἀφροδισίων*, de re venerea, talem fuisse credam, qui famam et existimationem feminae sapientis non contaminet, prorsusque dissimilis illis sit, quos de quibusdam superius nominatis indicare debui. Vtrum autem hoc argumentum philosophice magis tractauerit, an medice, definire non possum, et omnino in medio relinquo. At coniectura tamen me ducit, hoc scriptum ad medica pertinere, quoniam in vrbe *Aesculapio* sacra, et rebus medicis semper personante, natum fuit, parente fortassis *Asclepiade*; id quod ex nomine *Soteridis* diuinandi locus datur. Vixit, teste PHOTIO, ^{e)} temporibus NERONIS R. I.

§. XLIII.

c) in *Biblio. Antiquario Exegetica* Tom. I. Part. I. p. 61. f.

d) voce Πамφίλη.

e) *Bibliothec. pag. 387. edit. Rhotomag.* Nam omnino credo, illam a SVIDA laudatam ab hac non esse di-

uersam, quamuis PHOTIVS suam dixerit gente *Aegyptiam*. Fieri enim potest, ut parentes eius ex *Aegypto Epidaurum* venerint, ibique sedem fortunarum fixam esse iusserint, aut ex *Epidauro* in *Aegyptum* habitatum concesserint.

§. XLIII.

PANACEAM, *Aesculapii* filiam, ab eo, quod omnibus medeatur, dictam multa antiquitatis monimenta celebrant. HIPPOCRATES ^{f)} per hanc et *Hygeam* nullum non tiro- nem arti medicae initiandum iurare voluit. Pictam hanc vna cum parente et sororibus a *Socrate* admirabantur vete- res, teste PLINIO, ^{g)} qui et plantam *panacem Asclepion* vo- catam refert, ^{h)} quod *Aesculapius* filiam PANACEAM appellavit. PAVSANIAS ⁱ⁾ commemorat apud *Oropios* aram in partes quinque diuisam pro diuersis numinibus et heroibus. Huius pars quarta *Veneri* fuit assignata, PANACEAE, *Iasoni*, *Hygeae* et *Mineruae Paeoniae*. De cete- ro, ex ipsa numinum societate perspicuum est, quo apud ve- teres loco et numero habita PANACEA fuerit.

§. XLIII.

Ad POLYDAMNAM ordo nos deducit, feminam *Aegyptiam*, quam HOMERI ^{k)} carmina immortalī memo- riae consecrarunt. Legimus autem relatum, illam, quod *Thonis* vxor fuerit, medicamentorum omnium notitiam eximiam habuisse, et *Helenam* nobili quadam medicina donasse, quod ab effectu, cuius causa et auctor est, vocatur *νηπενθές τ' ἄγχολόν τε*, hoc est, quod lugere non sinat, et iram sedet et compescat.

F 3

Quae

f) in iure iurando.

g) *Hist. nat. Lib. XXXV. Cap. XI.*h) *Ibid. Lib. XXV. Cap. IV.*i) *Lib. I. Cap. XXXIV. pag. 84.*k) *Odyss. Δ. v. 227.* vbi EVSTATHIVS multa suppeditat. Nec praetereundum est, quod Scholia- stes minor, quem DIDYMV M aliqui vocant, ad hunc locum no- tat, ambiguum esse, sitne POLY- DAMNA nomen proprium mu-lieris, an adiectivum, quod ad *φάρμακα* referri debeat. Nam no- men illius feminae, quae *Thonis* coniux erat, fuisse THVMIS, a PTOLOMAEO commemo- rari. Sed non morari hoc du- bium nos poterit, quum POLY- DAMNAE nomen ab *Herodoto* et PHILOSTRATO de vita *Apol- lon. Tyanens. lib. VIII. cap. XXII.* confirmetur.

Quae occasio fuerit, ut *Helena* in *Aegyptum* veniret, et *Thoni*, ostio *Nili* praefecto, innotesceret, id quidem HERODOTVS copiosius exposuit. ^{l)} DIODORVS SICVLVS ^{m)} de eadem referens, POLYMNESTENEAM vocat: atque nepenthes illud apud solos diospolitianos inueniri tradit. Plerisque illud opium esse videtur; quoniam autem illud soporem obiicit hominibus et languorem; id quod de nepenthe non refertur: aliam oportet fuisse eius remedii temperationem. Sed de hoc fufius disputandi locus nobis daretur, si dissertationem cathedrae medicae inferuituram pararemus.

§. XLV.

Quum inter MULIERES MEDICAS maxime cenferi obstetrices debeant nobiliores et nomen immortale consecutae: nefas profecto esset omittere illam in sacris litteris ⁿ⁾ celebratam PVAM, quam etiam PHVAM, ΦΟΥΑΝ, scribunt. Haec vna cum socia SIPHRA ob singularem in puerulos Hebraeorum pietatem et conseruationem, quae familiis eorum adaugendis et amplificandis causam praebuit, iam pridem digna fuit, cuius nomen per figuram, quam antonomasiam vocant rhetores, pro quauis optima et perfectissima obstetrice ponatur.

§. XLVI.

MARIA SOPHIA SCHELHAMMERIA, magni HERMANNI CONRINGII filia, medico patre, et medico marito vfa, non alienum ab arte familiari animum habuit, eoque vehementer incitata operam dedit, ut ad artem coquinariam recte colendam homines formaret
ac

^{l)} lib. II. qui *Euterpe* inscribitur, Cap. CXII. et sequentibus.

^{m)} Bibliothec. histor. Lib. I. prope

finem; pag. 87. 88. edit. Rhodoman.

ⁿ⁾ Exod. I, 15.

ac fingeret. Et quamquam is ego non sum, qui coquum medicum esse velim; id quod apud ATHENAEVM^{o)} inductus comicus contendit, omnino polyhistorem coquum describens: idem tamen puto et prae me fero, rem culinariam a medicina subinde corrigendam et perficiendam esse, ut magis valetudini conseruandae, et refocillandis languentibus, conducat. Laudem meretur scriptum SCHELLHAMMERIAE,^{p)} quod hanc disciplinam complectitur; quo etiam docet modos, quibus fructus horaei ad longum tempus conseruari possint, ut reficiendis infirmis minusque valentibus tempestiue afferri queant.

§. XLVII.

IUSTINA SIEGEMVNDIA, nata DIETERICA, maiorum memoria valde claruit obstetricia laude, atque honorifice habita fuit in aula *Serenissimi Electoris Brandenburgici*, cui operam suam addixerat. Emisit illa librum notissimum de *arte obstetricia*,^{q)} cuius editio aliquoties repetita, certos omnino nos reddit, eum illius aetatis hominibus haud omnino displicuisse. Apud nos antehac floruit medicus, quem illa aequalem habuit, celeberrimus, idemque Professor, D. ANDREAS PETERMANNVS, qui dissertationi de gonorrhoea inscriptae additamentum aliquod subiiciebat, quo non dissimulabat, sibi non omnia in eo libro probari, laudari exempli gratia in eo enchirises non

o) *Deipnosophist. lib. VII. p. 290, 291. edit. Commelin.*

p) Indicem hunc praefixit: *Wohlunterwiesene Koechin, nebst der zu faelligen Confect - Tafel, Braunschweig MDCCC IV. 4to, Berolini MDCCCXXXII.*

q) Inscriptio haec est: *Chur-Brandenburgische Hoff - Wehennutter. Prodiit Coloniae ad Saeuum MDCC LXXX. 4to. cum multis tabulis aeneis. Repetita est editio MDCCC VIII, MDCCCXV, MDCCCXXIII.*

non solum omnino ad vsum ineptas, sed plane noxias. Quin etiam illud prae se tulerat, non satis mirari se posse, qui fieri potuerit, vt is liber censuram collegii medici sustineret. Haec res non solum irritauit SIGEMVNDIAM, et ad defendendas opiniones suas eam excitauit, sed etiam collegium illud, a quo censura profecta erat. Quae scripta in hac caussa edita sint, ex indicibus, quos in ora exhibebo, cognoscetur. ^{r)})

§. XLVIII.

Ordo nos vocat ad SALPEN, quam obstetricem fuisse PLINIVS ^{s)}) auctor est, qui saepe eam citat, quamquam ea, quae ipsi attribuit, leuioris momenti esse videntur. Ex eodem auctore ^{t)}) discimus, SOTIRAM etiam obstetricum olim adauxisse numerum. SIPHRAM, quam et SEPHORAM vocant, eiusdem professionis piam et integerrimam feminam fuisse, ex grauissimo testimonio MO-
SIS,

^{r)}) An D. Andr. Petermann, wegen eines Corollarii, so in der Disputation de gonorrhoea unter seinem Praesidio CIO IDC LXXX. abgelassenes Send-Schreiben Iustinae Sigismund. Cölln an der Spree. CIO IDC LXXXII. 4to. Reposuit huic PETERMANNVS noster scriptum, hoc indice insignitum: D. Andr. Petermanns, Anat. et Chirurg. P. P. ordinarii auf der Vniuersitaet Leipzig gründliche Deduction vieler Handgriffe, die in dem Buche: die Chur-Brandenburgische Hoff-Wehemutter genannt, gerühmet worden, und doch auf bloßer Speculation beruben: überdieses aber in der Praxi ungereimt, auch denen Wehemüttern und Kreissenden gefährlich sind. Nebst etlichen

Beylagen CIO IDC LXXXII. 4to Subsecutum est aliud scriptum: Iust. Sigismundin nöthiger Bericht, wider des D. Andr. Petermanns Deduction vieler ungereimter Handgriffe, etc. Cölln an der Spree. CIO IDC LXXXII. Sed PETERMANNO nostro non placebat diutius cum femina dimicare, et maiorem se laudem ablaturum sperabat, si omnem controuersiam totius rei publicae medicae permitteret iudicio, quam si victricia contra mulierem arma fumeret, aut litteras ab ea victrices et laureatas acciperet.

^{s)}) Hist. nat. Lib. XXVIII. Cap. 7. Lib. XXVIII. Cap. 10. Lib. XXXIII. Cap. 10.

^{t)}) Ibid. Lib. XXVIII. Cap. 7.

sis, u) viri a Deo docti, intelligimus. Socia fuit illius PVAE, quam supra laudauimus. Fuerintne autem hae ambae obstetrices *Aegyptiae*, an *Ebraeae* originis ac gentis, inter eruditos viros dubitatum est. *Ebraeam* quidem originem illis vindicatum iuit CL. M. GOTTLOB FRID. GVDIVS v).

§. XLVIII.

THEODOSIA sequitur, quae circa annum Christi cccix inclaruit, et ob professionem Christianae fidei gladio percussa est, regnante *Diocletiano* Imp. Quum in viuis esset, tantam medicinae et chirurgiae sibi famam peperit, vt non minus hac peritia Romae clara esset, quam constantia aeternam memoriam consecuta sit. Sanctorum quippe catalogo nomen eius insertum, et a. d. XXIX Maii in fastis scriptum fuit. Vid. CHR. BENED. CARPZOVIVS w).

§. L.

Ordini MULIERVM MEDICARVM haud exiguum decus adfert, et, tanquam fulgidissimum sidus, elucet ELEONORA, Dux TROPPIAVIENSIS et IAEGERN-DORFIENSIS, quae, more plurium illustrium feminarum, quicquid ad medelam morborum promptum et vtile viderat, aut ab aliis visum et comprobatum perceperat, in futuros vsus annotauit, et conscripsit. Ex hoc studio enatum ipsi est volumen insigne, quod medicinas fere in omnibus humani corporis morbis complectitur. Summo applausu exceptum id fuit opus, x) saepiusque renouatum, etiam proximis annis.

§. LI.

u) *Exod. I. 15.*

v) in exercitatione philologica de *Ebraica obstetricum origine*, Lips.

cio 1000 xxiv.

w) in dissertatione, qua *medicos ab*

ecclesia pro sanctis habitos illustrauit cio 1000 ix, §. XXVIII, et fac multos testes hanc in rem citauit.

x) Editiones primae inscribuntur:

§. LI.

VICTORIAM, MULIEREM MEDICAM, posteritatis memoriae prodidit OCTAVIVS HORATIANVS, quem THEODORVM PRISCIANVM alii appellant. Huic enim inscripsit librum suum tertium, quem de passionibus mulierum et curis earundem insigniuit. Quod artis non solum gnara fuerit, sed eandem exercuerit apud feminas, quibus communis arridet sexus, ex ipsa praefatione discimus. Plura quidem in promptu non habeo, quae de ea referam. In editione, quam SIGISM. GELENIVS procuravit,^{y)} non VICTORIAE, sed SALVINAE cuidam, hic liber dedicatur. Vtrum vero nomen rectius hic legatur, id quidem eorum deliberationi relinquendum erit, quibus meliores codices manu exaratos inspiciendi occasio datur. Mihi etiam de SALVINA non suppetunt alia dicenda.

§. LII.

ANNA WOLLEY, mulier illustris in Magna Britannia nata, de arte coquinaria, et de variis ad gynaecei curam pertinentibus scripsit. Extat inter libros eius, qui inscriptus est *pharmacopolium muliebris sexus*. Multis eas commentationes probatas esse, vel ex eo cognosci potest, quod non solum in nostrum patrium sermonem conuerti meruerunt, verum etiam saepius typis descriptae sunt. Indicem^{z)} sub-

Eleonorae Hertzogin von Troppau und Jägerndorff VI. Bücher aus-erlessener Artzeneyen, und Kunststücke fast vor alle des menschlichen Leibes Gebrechen und Kranckheiten. Torg. MDCXC. fol. Zerbst MDCXCIII. 4. Leipzig MDCXVIII. 4. Idem opus sub alio indice recentius prodiit: Aufgesprungener Granat-Apfel des Christlichen Samariters, oder eröffne-

te Geheimnisse vieler vortrefflicher Artzeney Mittel nebst einer Dieta und Kochbuche, worinnen allerhand denen Krancken dienliche Speisen angewiesen werden. Leipzig MDCXCIX. 4. Nürnberg MDCCCXXXIII. 4.

y) *Basileae apud Frobenium MDCXXXII. 4to.*

z) *Frauen-Zimmer Zeit Vertreib oder reiches*

subiiciemus. Huic statim subiungimus ANNAM WECKERIAM, cuius librum de arte coquinaria hodieque habemus. ^{a)})

§. LIII.

Agmen claudat non vltima quidem, si nominis famam, et fiduciam spectes, quam in eam ponunt multi arcanioris chemiae amatores, DOROTHEA IVLIANA WALLICHIA. Non veritam fuisse hanc feminam, manus niueas atro carbonum puluere subinde inquinare, et experimentis multum tribuisse, laudi omnino ducimus. De reliquis iudicium permittimus hanc scientiam adeptis. Nobis sufficit indicem dare scriptorum. ^{b)})

§. LIIII.

Atque sic percurrimus MULIERES MEDICAS, quas celebratas scriptis inuenimus; non omnes quidem; fatemur enim, nos omisisse quasdam, de quibus, praeter nomen, nihil legabamus, aut quas de aliis agentes, simul indicauimus. Quoties, verbi causa, AEGLIN et PANACEAM nominauimus, non potuit fieri, quin ACESO et IASO, et, si qua alia est AESCVLAPII filia, etiam significaretur, aut saltem da-

G 2

retur

reiches Gemach von ausserlesenen Experimenten und Curiositaeten, bestehend in einem vollkommenen Kochbuche; Praeseruir- und Candir-Kunst, Frauen-Zimmer Apothecke, Hamburg MDCLXXIV. MDCLXXXVIII. MDCCXCVII. 12. Breuiori etiam titulo prostat: *Vollkommener Koch- und Frauen-Zimmer Apothecke, Hamburg* MDCLXXXVIII. 12.

a) *Basileae* MDCCXX. 8uo. et *ib.* MDCLII. *Ambergae* MDCCXVII. 4. et MDCC.

b) *Mineralisches Gluten, doppelter Schlangen-Stab, Mercurius Philosophorum, langer und kurtzer Weg zur Vniuersal-Tinctur. Leipzig* MDCCV. 8uo. *Philosophischer Perlbaum, das Gewächse derer drey Principien, zu deutlicher Erklärung des Steins der Weisen, etc. Ibid.* MDCCV. 8uo. *Schlüssel zu dem Cabinet der geheimen Schatz-Kammer der Natur, zur Such- und Findung des Steins der Weisen, Leipzig* MDCCVI. 8uo.

retur indicium, vbi de his feminis a veteribus actum sit. Superest, vt per lancem quasi saturam etiam de illis aliquid subiiciamus. Magnum illud CORPVS INSCRIPTIONVM, quod IANI GRVTERI industria collectum habemus, suppeditat nobis ^{c)} IVLIAM Q. L. C. *Quinti Libertam* SABINAM, cui Q. IVL. ATIMETVS monimentum posuit. Aliam MINVCIAM medicam, pariter libertam ibidem legimus: vt et SENTIAM ELIDEM medicam, cui contubernali monimentum curauit C. CORNELIVS MELIBOEVVS. Hanc feruam fuisse medicam, manifestum est. Ex eadem inscriptionum collectione nouimus MARIAM, libertam AGREPINAE, obstetricem, et ANTONIAM AVG. L. THALLVSAM; nec non SALLVSTIAM Q. L. IMERRIAM, ambas pariter obstetrices.

§. LV.

Non possum, quin hic subiungam MVLIEREM MEDICAM, quam in ordine superiori collocare mihi non licuit, quippe nominis ignaro. Est haec coniux medici chirurgi celeberrimi GVIL. FABRICII HILDANI, quem ob artis peritiam, raro sane exemplo, ciuitate donauit S. P. Q. *Bernensis*. Rem ab vxore peractam refert ipsemet. ^{d)} Nos in pauca, quae ille verbosius recitauit, hic contrahemus. Accidit nimirum, vt absente *Fabricio Hildano* vir quidam super congelata terra retro in capulum gladii caderet, ac nonam deci-

c) Pag. DCXXXVI. num. 1. 2. 3. 4. 5.

6. Quamquam vero laudatae his lapidibus obstetrices seruilis primum conditionis fuerint, et libertae per manumissionem factae sint, non tamen concludendum esse, quod omnes olim Romae obstetrices fuerint seruilis aut libertinae conditionis, colligere licet ex PLI-

NIO Lib. XXXIII. Cap. 6. iamque aliis argumentis probauit IO. HENR. SCHVLZE in dissert. de seruis medicis §. 29. et seqq. Add. Diss. de Honoribus Medicorum apud veteres, Praesidente CEL. WOLLIO, An. MDCCCXXX a me habita, p. 38. f. d) *Observat. Chirurg. Cent. V. obseru. LXXXV.*

decimamque costam sinistri lateris prope spinam confringeret; vnde periculi plenissima symptomata ingruebant. His vero omnibus virum hunc excipiebat FABRICIA aduocata, quae curationem tam manu, quam medicamentis, per decem ipsos dies, quibus maritus aberat, tam dextre administrabat, vt hominem integerrimae valetudini restitueret. Quod si haec femina antiquis heroum temporibus vixisset, forte in numinum medicorum concilium adoptata, et EPIONAE ad latus posita fuisset.

§. LVI.

Equidem nullus dubito, quin quam plurimae et olim fuerint, et hodieque supersint, MULIERES MEDICAE. Curiositas enim sexus elegantioris, quae in se quidem spectata, nullam vituperationem meretur, tanta est, vt diligenter obseruet, quicquid apud aegrotos conspicuum aliquem fructum edit. Atque talia a medicis minus denegantur roganti feminae illustri, nobili aut alias honestae, quam saepe viris. Harum aliquae acceptum arcanum sub fide silentii in familiis suis conseruant et propagant, liberaliterque cuius indigenti et petenti suppeditant. Absit a me, vt hoc vlla reprehensione dignum censeam. Sed negari etiam illud nequit, quod saepe irritus, nec raro noxius sit effectus, quoties medicina vel causae morbi non congrua, vel non opportunis temporibus, datur. Ignoro etiam, quid singulare sit, quod medicinae istiusmodi ab illustribus datae, aliquando plus iuuent, quam si eadem ab alio quocunque datae fuissent. Sic a certo viro accepi, illustrissimam quandam matronam in, nescio qua, imperiali vrbe cognouisse, quae magna perfecit emplastro illo per omnes officinas obuius, quod citrinum vocatur. Quum efflagitantium illud emplastrum tam multi accurrerent, illa diutius rem non celauit,

lavit, esse illud, quod in officinis paretur, ipsosque inde petere iussit. Sed renuntiatum ipsi crebro fuit, hoc, quod a pharmacopoeo vendatur, speratas haud habere vires. At quum idem ex manu matronae, in qua fiduciam nimiam ponebant, accepissent, praesens eius auxilium laudibus in coelum extulerunt. Vides, quantum persuasio hominum et fiducia possit! Paruulam rei caussulam alii, quibus ista placet inquisitio, scrutentur.

§. LVII.

Non est huius loci, ut inquiramus, quantum rei publicae aut intersit, aut noceat, si MULIERIBVS permittatur MEDICINA. Bonae leges satis cauerunt publico huius libertatis abufui, ac volunt eadem, ut artem hanc nobilissimam exercent, qui ex solidis eam callent fundamentis, et ex magistris idoneis didicerunt, speciminibusque editis spectati et publica auctoritate muniti sunt. Vbi vero tempus et locus his uti non permittunt: quis prohibebit ab opere humanitatis et misericordiae mulierem, quae medicinam se facere posse gloriatur? Ipsi solent medici prudentiores non adspernari bene monentis feminae consilia: meliusque videtur esse, si res eo deducatur, ut, monente et dirigente medico, ad curationem MULIERES concurrant, quam ut, absente et inscio medico, aliquid moliantur, quod aegrotantis in perniciem euadat; cuius tamen culpa, quia vera celatur et occultatur, tandem plerumque in medicum confertur. Atque, his expositis, MULIERES MEDICAS valere iubeo.

EXPLICIT.

